



**ՄԱՅՐ ՎԹՈՒ ՍՈՒՐԲ ԷԶՍԻԱԾՆԻ
ԿՐՈՆԱԿԱՆ, ՄԵԿՎՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ**

Ամենայն Հայոց Կաթողիկոսի սրբատառ Կոնդակը

ԳԱՐԵԳԻՆ Բ ԾԱՌԱՅ ՅԻՍՈՒՍԻ ՔՐԻՍՏՈՍԻ,
ՈՐՈՐՄՈՒԹԵԱՄԲԼ ԱՍՏՈՒԾՈՅ ԵՒ ԿԱՍՈՔՆ ԱԶԳԻՍ
ԵՊԻՍԿՈՊՈՍԱՊԵՏ ԵՒ ԿԱԹՈՂԻԿՈՍ ԱՄԵՆԱՅՆ ՀԱՅՈՑ,
ԾԱՅՐԱԳՈՅՆ ՊԱՏՐԻԱՐԽ ՀԱՍՏԱԶԳԱԿԱՆ ՆԱԽԱՄԵԾԱՐ ԱԹՈՒՈՅ ԱՐԱՐԱՏԵԱՆ
ԱՌԱՔԵԼԱԿԱՆ ՄԱՅՐ ԵԿԵՂԵՑԻՈՅ ՍՐԲՈՅ ԿԱԹՈՒՂԻԿԵ ԷԶՍԻԱԾՆԻ
ՔՐԻՍՏՈՍԱԲԱՆԴ ՍԻՐՈՅ ՈՂՋՈՅՆ ԵՒ ՕՐՀՆՈՒԹԻՒՆ ՀԱՅՐԱՊԵՏԱԿԱՆ
ՄԵԾԻ ՏԱՆՆ ԿԻՆԻԿԻՈՅ ԿԱԹՈՂԻԿՈՍՈՒԹԵԱՆ, ՊԱՏՐԻԱՐԽՈՒԹԵԱՆ ՀԱՅՈՑ
ՍՐԲՈՅ ԵՐՈՒՄԱՐԻՄԱՅ ԵՒ ԿՈՍՏԱՆԱՆՈՒՊՈԼԻՍՈՅ,
ԱՐՔԵՊԻՍԿՈՊՈՍԱՅ, ԵՊԻՍԿՈՊՈՍԱՅ, ԿԱՐԴԱՊԵՏԱՅ, ՔԱՅԱՆԱՅԻՑ ԵՒ ՍԱՐԿԱԲԱՍՅ,
ԹԵՄԱԿԱՆ ԵՐԵՍՓՈԽԱՆԱԿԱՆ ԺՈՂՈՎՈՑ, ԹԵՄԱԿԱՆ ԵՒ ՀԱՄԱՅՆՔԱՅԻՆ ԽՈՐՀՐԴՈՑ ԵՒ
ՊԱՇՏՈՆԵՒՑ ԵՒ ՍԻՐԵՑԵԱՆ ՀԱՄԱՅՆ ՀԱՄԱՏԱՑԵԱՆ ԺՈՂՈՎՐԵԱՆ ՀԱՅՈՑ

«Ձարթիք, որդիք լուսոյ,
ի յօրինութիւն Զօրն լուսոյ»
(Ժամագիրք),

«Աղաղակելով որպէս
դէտ ի բարձր դիտանոց
զպատուիրանս Աստուծոյ
ի լսելիս ձեր»
(Թուղթ ընդհանրական):

Երախտիքի նուիրական զգացումով այս տարի ոգեկոչում ենք Հայոց առաքելապատիւ հայրապետ Սուրբ Ներսէս Ծնորհալու վախճանման 850-ամեակը:

Սուրբ Ներսէս Ծնորհալի հայրապետը հայոց նշանաւոր ու մեծագործ կաթողիկոսներից է, փայլուն աստուածաբան, հզոր քարոզիչ, բանաստեղծ եւ երգահան, պատմիչ ու մանկավարժ: Ներսէս Դ հայրապետը, որպէս քաջ հովիւ, որ «զանձն իւր դնէ ի վերայ ոչխարաց» (Յովհ. Ժ 11), եղաւ առաքինազարդ առաջնորդ, լուսապայծառ փարոս մեր ժողովրդի համար եւ Տիրոջ անխնայ մշակ: Նա իր բազմաբեղուն առաքելութիւնը ծաւալեց Հոռնկայում հաստատուած հայրապետական աթոռից: Երանաշնորհի հովուապետը կաթողիկոսական մատակարար տարագրութեան պայմաններում, ձգտելով միասնական ու ամբողջ պահել իր ժողովրդի հոգեւոր եւ ազգային կեանքը, հայեացքը միշտ դէպի հայրենիք, օրհնաբանում էր

քրիստոսահիմն հայոց հոգեւոր կենտրոնի՝ Սուրբ Էջմիածնի բացառիկ կարեւորութիւնն ու նշանակութիւնը. «Հայաստանեայցդ Եկեղեցի, յորում կաթեաց շողն երկնային.... լոյսն անստուեր ծաւալեցաւ, եւ ճառագայթն անճառելի»:

Սուրբ Ներսէս Ծնորհալու ողջ կեանքն ու գործունեութիւնը Աստուծոյ փառաբանութիւն էր եւ մարդկանց սրտերը Աստուծոյ մերձեցնելու տքնաշան առաքելութիւն: Նա անյոգնաբեկ քարոզչութեամբ Տիրոջ պատուիրաններն էր ուսուցանում հաւատացելոց՝ «զարթիք, որդիք լուսոյ, ի յօրինութիւն Զօրն լուսոյ», «աղաղակելով որպէս դէտ ի բարձր դիտանոցէ զպատուիրանս Աստուծոյ ի լսելիս ձեր»: Մեծանուն հայրապետը հովուեց հայոց հօտը դժուարին ու աղէտալի ժամանակներում՝ մեծ ցաւ ու տրտմութիւն կրելով մեր ժողովրդի տարագրուած ու զաղթական դարձած բազում զաւակների համար: Նա հայրաբար խրատական իր ազդու խօսքն ուղղում էր բոլորին՝ իշխաններից մինչեւ գիւնդուր ու շինական, եպիսկոպոսներից մինչեւ քահանայ, սարկաւազ ու դպիր՝ հաւատով զօրացնելով եւ գիտելիքներով սնուցելով ամենքին: Սուրբ Ներսէս Ծնորհալու հոգեթով խօսքը, նշանակալի աշխատութիւնները, տաղերն ու զանգերը՝ իւրայատուկ մտքի խոյանքով ու վայելուչ ոճով, ուղղուած են հայոց ազգային-քրիստոնէական ինքնութեան պահպանմանը, հոգեւոր



եւ մշակութային կեանքի բարձրացմանն ու բիրեղացմանը: Երանաշնորհ հայրապետի բեղուն գրչի արգասիքները բարեգարդեցին մեր Եկեղեցու ծիսակարգերը, արթուն պահեցին մեր ժողովրդի քրիստոնէական հոգին ու միտքը եւ լուսաւորեցին նրա քարոս ուղին դէպի հոգեւոր եւ ազգային զարթոյնի նոր հորիզոններ:

Սուրբ Ներսէս Ծնորհալին մեծ համբաւ ու ճանաչում է ունեցել նաեւ միջազգային ու միջեկեղեցական ասպարէզում: Յունաց, ասորաց, լատինաց քրիստոնէայ աշխարհում հոգեւորականներ եւ հաւատացեալներ տպաւորուել ու ոգեշնչուել են նրա առաքինի վարքից եւ գիտական մեծութիւնից: Մշտապէս ապաւինելով Աստուծոյ ողորմածութեանը՝ նա յուսառատ ջանքեր գործադրեց՝ ի խնդիր Եկեղեցիների սիրով գործակցութեան: Հայոց երանելի հայրապետը քրիստոնէական Եկեղեցիների միջեւ ծառացած դարաւոր բաժանումը ջանացաւետարանական ոգով փարատել, եղաւ ջատագովը քրիստոնէայ աշխարհի միասնականութեան՝ Հայ Եկեղեցու դիրքորոշումը բնորոշելով «Միութիւն ի կարեւորս, ազատութիւն յերկբայականս եւ սէր յամենայնի» բանաձեւով:

Միւրեւիներ, հայագի մեծագործ զաւակների կեանքի ու գործոց պայծառ օրինակները լուսաւոր ուղենիշ են սերունդների համար: Հայոց տաղանդաշատ ու հռչակաւոր անձանց յիշատակի նորոգումով, որպիսին

է Սուրբ Ներսէս Ծնորհալի հայրապետը, այլեւ նրանց գօտեպնդող յորդորներով, խրատներով ու խրախուսանքով ուժ է առել մեր ժողովուրդը՝ դիմակայելու փորձութիւններին, ապրելու, մաքառելու եւ բարձրացնելու իր կեանքը առաջադիմութեան եւ լուսաւոր գալիքի կերտման ճանապարհին: Ծնորհալի հայրապետն իր վառ օրինակով այսօր էլ, «աղաղակելով որպէս դէտ ի բարձր դիտանոցէ զպատուիրանս Աստուծոյ», ոգեշնչում է հաւատացելոց՝ ըստ առաքելական պատուիրի. «Ամենեցուն զանձն օրինակ կացուցանել՝ գործոց բարութեան, վարդապետութեամբ զանեղութիւն ունել, զսրբութիւն, զպարկեշտութիւն, զբանն ողջմտութեան» (Տիմ. Բ 7–8):

Հայրապետական այսու կոնդակով հրաւեր ենք ուղղում Առաքելական մեր Սուրբ Եկեղեցու թեմական եւ ազգային կառոյցներին, գիտական ու կրթական հաստատութիւններին, բարեսիրական, հայրենակցական կազմակերպութիւններին եւ համայն մեր ժողովրդին՝ գիտաժողովներով, հրատարակութիւններով ու համդիտութիւններով նշանաւորել Սուրբ Ներսէս Ծնորհալու անմար յիշատակը, վերարժեւորել ազգային եւ համաեկեղեցական անդաստանում միշտ արդիական նրա աւանդը, մեծարել քրիստոնէական հաւատքի ականաւոր ուսուցչին եւ ազգային-հոգեւոր մեր կեանքը նորոգողին:

Տիրոջ Իջման սուրբ սեղանի առջեւ աղօթում ենք, որ բարերարն Աստուած, Սուրբ Ներսէս Ծնորհալի Հայոց հայրապետի բարեխօսութեամբ, Իր ամենախնամ Աջի հովանու մերթոյ պահպանի եւ հաւատով, յոյսով ու սիրով զօրացնի համայն մեր ժողովրդին՝ դիմագրաւելու մեր կեանքը յուզող դժուարութիւնները եւ իրականացնելու լուսաւոր գալիքի համազգային իղծերը: Թող Տէրը խաղաղութիւն ու բարօրութիւն պարգեւի մեր հայրենիքին եւ անասան ու պայծառ պահի Հայաստանեայց Առաքելական մեր Սուրբ Եկեղեցին այսօր եւ միշտ. ամէն:

Օրհնութեամբ՝

ԳԱՐԵԳԻՆ Բ
ԿԱԹՈՂԻԿՈՍ ԱՄԵՆԱՅՆ ՀԱՅՈՑ

Տուաւ կոնդակս յ3-ն մարտի
յամի Տեառն 2023 եւ ի թուին հայոց ՌՆՀԲ
ի Մայրավանս Սրբոյ Էջմիածնի
ընդ համարաւ 1211

Ն. Ս. Օ. Տ. Տ. Գարեգին Բ Ամենայն Հայոց Կաթողիկոսի շնորհավորական ուղերձը Մարտի 8-ի՝ Կանանց տոնի առիթով

Քարանձաղներով լեցուն Մարտի 8-ի այս տոնական օրը Մայր Աթոռ Սուրբ Էջմիածնից հայրապետական Մեր օրհնությունն ու շնորհալիւրանքն ենք բերում մեր մայրերին, քույրերին ու դուստրերին եւ երախտագետ սրտով մեծարում նրանց նվիրյալ ու սիրառատ ջանքերն ընտանեկան կյանքի բարօրության ապահովման գործում, ինչպէս նաեւ՝ զովարժան ավանդը պետական ու հասարակական կյանքի տարբեր ասպարեզներում:

Միւրեւի՝ մայրեր եւ քույրեր, ընտանիքին ու հայրենիքին ձեր նվիրումով եւ պահպանմամբ եւ սերնդեսերունդ փոխանցում մեր ազգային ավանդույթները, ձեր հոգատար

դաստիարակությամբ եւ հասակ առնում ազգի եւ Եկեղեցու արժանաւոր զավակները, որոնք մեր պատմության վնասէր ինչ հանգրվաններում, ինչպէս նաեւ արցախյան պատերազմի օրերին եւ ներկայիս իրենց սիրաւքներով ու անձնագիտությամբ հերոսանում են հայրենյաց պաշտպանության սրբազան առաքելության մեջ:

Այսօր ամենքիս պարտքն է անխոնջ աշխատանքով ապահովել մեր երկրի անվտանգ ու խաղաղ ապագան, միասնական ոգով աշակից լինել Արցախում շրջափակման մեջ գտնվող մեր ժողովրդին, առանձնակի հոգածություն եւ ուշադրություն ցուցաբերել մեր վիրավորված

զավակներին եւ նահատակ քաջորդիների ընտանիքներին:

Հայրապետիս աղոթքն ու մաղթանքն է, որ Տէրը հաստատուն պահի տիկնանց եւ օրիորդաց հաւատքի, բարի գործերի ու առաքինությունների մեջ եւ շնորհի արեւշատ կյանքի երջանիկ օրեր: Հայցում ենք, որ բարձրյալն Աստված խաղաղ ու բարօր պահպանի մեր հայրենիքը եւ մեր աշխարհասփյուռ ժողովրդին՝ պարգեւելով ուժ եւ կորով՝ կերտելու իր լուսավոր ապագան:

Մեր Տէր Հիսուս Քրիստոսի շնորհները, սերն ու խաղաղությունը թող լինեն ձեզ ամենքիդ հետ. ամեն:

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ

Ամենայն Հայոց Կաթողիկոսն ընդունեց

Մարտի 8-ին

«Ռենովաբիս» բարեգործական կազմակերպության գլխավոր գործադիր տնօրենին

Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսն ընդունեց «Ռենովաբիս» բարեգործական կազմակերպության գլխավոր գործադիր տնօրեն ղոկտոր հայր Թոմաս Շվարցին:

Հանդիպմանը Նորին Սրբությունն իր գնահատանքը բերեց հայր Թոմաս Շվարցին՝ Հայաստանում կազմակերպության կողմից իրականացվող բարեգործական ծրագրերի համար, որոնք ուղղված են հատկապես պատերազմից տուժած ընտանիքներին: Վեհափառ Հայրապետն անդրադարձավ «Ռենովաբիս» բարեգործական կազմակերպության եւ Մայր Աթոռի միջեւ առկա ջերմ հարաբերություններին ու բազմամյա համագործակցությանը՝ գոհունակություն հայտնելով Հայաստանի համար դժվարին իրավիճակներում քույր եկեղեցիների ցուցաբերած զորակցության համար:

Զրույցի ընթացքում Հայոց Հայրապետն անդրադարձավ նաեւ Հայաստանի եւ Արցախի առջեւ ծառացած անվտանգային հիմնախնդիրներին, Ադրբեջանի՝ Հայաստանի ինքնիշխան տարածքների բռնազավթմանն ու շարունակվող ագրեսիային, ինչի վկայությունն է Լաչինի միջանցքի արգելափակումը, ինչպես եւ օրերս ադրբեջանական դիվերսիոն խմբի հարձակումն Արցախի ոստիկանության աշխատակիցների վրա: Այս առնչությամբ Նորին Սրբությունը կարեւոր նկատեց միջազգային հանրության ջանքերը՝ ուղղված տարածաշրջանում կայունության հաստատմանն ու մեր ժողովրդի արդար իրավունքների պաշտպանությանը:



նում կայունության հաստատմանն ու մեր ժողովրդի արդար իրավունքների պաշտպանությանը:

Իր հերթին հայր Թոմաս Շվարցը, խոսելով կազմակերպության մարդասիրական առաքելության մասին, ընդգծեց, որ մշտապես զորակից է կարիքավորներին ու եկեղեցուն եւ պատրաստակամություն հայտնեց շարունակելու գործակցությունը Հայ եկեղեցու հետ:

պան Ֆաբիո Վագ Պիտալուզային: Նորին Սրբությունը շնորհավորեց դեսպանին նշանակման առիթով՝ մաղթելով նրան արդյունավոր առաքելություն Հայաստանում: Վեհափառ Հայրապետը կարեւորեց հայ-բրազիլական կապերի ամրապնդումը եւ գործակցության հետագա խթանումը: Հայոց Հայրապետն ուրախությամբ արձանագրեց, որ Բրազիլիայի հայ համայնքն իր կարեւոր ներդրումն է բերում երկրի առաջընթացին՝ արժանանալով Բրազիլիայի իշխանության եւ ժողովրդի բարյացակամ ու հոգատար վերաբերմունքին:

Այնուհետեւ նորանշանակ դեսպանը Նորին Սրբությանը ներկայացրեց առաջիկա

իր ծրագրերը՝ հատկապես կարեւորելով հայ-բրազիլական մշակութային ու տնտեսական կապերի զորացմանն ուղղված միջոցառումների իրականացումը: Դեսպանը հավաստիացրեց, որ ջանքեր կներդնի համուն երկու պետությունների բարեկամական ջերմ հարաբերությունների առավել ամրապնդման:

Հանդիպմանն անդրադարձ կատարվեց նաեւ տարածաշրջանում առկա մարտահրավերներին, Հայաստանի եւ Արցախի առջեւ ծառացած անվտանգային հիմնախնդիրներին, Հայաստանի տարածքային ամբողջականության դեմ Ադրբեջանի ոտնձգություններին եւ Արցախում ստեղծված հումանիտար ճգնաժամին:



Մարտի 14-ին

ՀՀ-ում Վրաստանի Հանրապետության Նորանշանակ դեսպանին

Ամենայն Հայոց Կաթողիկոսն ընդունեց Հայաստանի Հանրապետությունում Վրաստանի Հանրապետության արտակարգ եւ լիազոր դեսպան Գիորգի Շարվաշիձենին:

Իր օրհնությունը բերելով նորանշանակ դեսպանին՝ Նորին Սրբությունը մաղթեց վերջինիս արդյունավոր առաքելություն՝ ի նպաստ հայ եւ վրաց ժողովուրդների դավոր բարեկամության առավել զորացման:


Ամենայն Հայոց Հայրապետն ընդգծեց, որ երկու ժողովուրդների դարավոր բարեկամության հիմքում նաեւ քրիստոնեական արժեքներն են, որոնց շնորհիվ հայ եւ վրաց ժողովուրդները պահպանել են իրենց գոյությունն ու ինքնությունը: Նորին Սրբությունը

վստահություն հայտնեց, որ եղբայրական ժողովուրդներն իրենց լավատեսական ոգու եւ զորեղ հավատքի միջոցով կհաղթահարեն առկա մարտահրավերներն ու փորձությունները:

Հանդիպմանն անդրադարձ կատարվեց նաեւ Վրաստանի հայ համայնքի կարեւոր ներդրմանը երկրի զարգացման գործում:

Դեսպան Գիորգի Շարվաշիձեն, Նորին Սրբությանը փոխանցելով Համայն Վրաստանի Կաթողիկոս-Պատրիարք Իլյա Երկրորդի ողջույնները, հավաստիացրեց, որ ջանքեր կգործադրի հայ-վրացական կապերի առավել զորացման ուղղությամբ:

Զրույցի ընթացքում դեսպանը կարեւորեց նաեւ տարածաշրջանում խաղաղությանն ու կայունության հաստատումը:



Մարտի 9-ին

ՀՀ-ում Բրազիլիայի Նորանշանակ դեսպանին

Ամենայն Հայոց Կաթողիկոսն ընդունեց Հայաստանի Հանրապետությունում

Բրազիլիայի Դաշնային Հանրապետության նորանշանակ արտակարգ եւ լիազոր դես-

Ավարսվեց Գերագույն հոգեւոր խորհրդի Ժողովը

Փետրվարի 28-ից մարտի 3-ը Մայր Աթոռ Սուրբ Էջմիածնում Ն. Ս. Օ. Տ. Տ. Գարեգին Երկրորդ Ծայրագույն Պատրիարք եւ Ամենայն Հայոց Կաթողիկոսի նախագահությամբ տեղի ունեցավ Գերագույն հոգեւոր խորհրդի Ժողովը: Ժողովի նիստերն ատենապետեց Արեւմտյան Եվրոպայի հայրապետական պատվիրակ Ս. Խաժակ արք. Պարսամյանը:

Հայաստանում եւ Արցախում 44-օրյա պատերազմի հետեւանքով ստեղծված կացության եւ առկա մարտահրավերների մասին զեկույց ներկայացրեց ԳՀԽ անդամ, իրավաբանական գիտ. դոկտոր Գեւորգ Դանիելյանը: Զեկույցողը, հանգամանորեն ներկայացնելով Հայաստանում եւ Արցախում ստեղծված կացությունը, անդրադարձավ երկրի շուրջ ընթացող աշխարհաքաղաքական զարգացումներին՝ մասնավորապես անվտանգային մարտահրավերներին:

Անդրադառնալով Արցախի հիմնախնդրին՝ ԳՀԽ-ն արձանագրեց, որ արցախահայության անվտանգության երաշխիքն Արցախի անկախության ճանաչումն է՝ ելակետ ունենալով ազգերի ինքնորոշման հիմնարար սկզբունքը: Այս առնչությամբ կարեւորվեցին համազգային ընդհանուր ջանքերի միավորումը, միջազգային հանրության ամենալայն շրջանակների աջակցության ապահովվումը եւ մասնավորապես եկեղեցու՝ այդ ուղղությամբ իրականացվող աշխատանքների առավել ընդլայնումը:

Մայր Աթոռի լուսարարապետ Ս. Մուշեղ եպս. Բաբայանը ժողովականներին տեղեկություններ փոխանցեց Մայր տաճարի հիմնանորոգության եւ ամրակայման աշխատանքների վերաբերյալ: Ծանուցվեց, որ բարեհաջող ընթացքի մեջ են Մայր տաճարի ներքին հարդարման, որմնամակարների վերականգնման, օդափոխության

համակարգի տեղադրման եւ արտաքին բարեկարգման աշխատանքները, որոնց ավարտը նախատեսվում է սույն թվականի սեպտեմբեր ամսին:

Ողջունելով կատարված աշխատանքները՝ ԳՀԽ-ն գոհունակությամբ արձանագրեց, որ տեւական դադարից հետո Մայր տաճարն իր դռները կբացի հուրախություն եւ ի մխիթարություն բարեպաշտ ժողովրդի:

Մայր տաճարի վերածնունդ, մյուսոմորիության, եպիսկոպոսաց ձեռնադրության եւ հարակից միջոցառումների կազմակերպման վերաբերյալ զեկույցով հանդես եկավ Մայր Աթոռի դիվանապետ Ս. Արշակ արք. Խաչատրյանը: Սրբազան հայրը ժողովականներին տեղեկացրեց, որ արարողություններն ու միջոցառումները հավուր պատշաճի կազմակերպելու համար ձեւավորվել են հանձնախմբեր, որոնք կհամակարգեն ծիսական, արարողակարգային,

հրատարակչական, քարոզչական եւ տեղեկատվական ոլորտների աշխատանքները: Գերագույն հոգեւոր խորհուրդը գոհունակությամբ ընդունեց ներկայացվածը եւ ծրագրեց Մայր տաճարի վերածնունդ, մյուսոմորիության արարողությունները եւ հարակից միջոցառումները կազմակերպել սույն թվականի սեպտեմբերի 30-ից հոկտեմբերի 3-ն ընկած ժամանակահատվածում, իսկ եպիսկոպոսական ձեռնադրությունը՝ հոկտեմբերի 8-ին:

Մայր Աթոռի արտաքին հարաբերությունների եւ արարողակարգի բաժնի տնօրեն Ս. Նաթան արք. Հովհաննիսյանը ժողովականներին ներկայացրեց Սուրբ Ներսես Շնորհալի հայրապետի մահվան 850-րդ տարելիցին նվիրված տոնակատարությունների շրջանակում նախատեսված հոգեւոր, կրթական, մշակութային միջոցառումների ծրագիրը: ➔ էջ 3

Ավարսվեց Գերագույն հոգեւոր խորհրդի ժողովը

← էջ 2

Նշվեց նաեւ, որ առաջիկա կիրակի՝ մարտի 5-ին, Հայոց եկեղեցիներում կընթերցվի Սուրբ Ներսէս Շնորհալու մահվան 850-րդ տարելիցին նվիրված հայրապետական կոմիտէ:

Նախան սրբազանը տեղեկացրեց, որ ի նշանավորումն երանաշնորհի հայրապետի մահվան 850-րդ տարելիցի՝ սույն թվականի դեկտեմբերին Հայ Առաքելական Սուրբ Եկեղեցին եւ Հռոմի Կաթոլիկ Եկեղեցին Վատիկանում կկազմակերպեն համատեղ միջոցառումներ: Սրբազան հայրը նշեց նաեւ, որ Սուրբ Ներսէս Շնորհալու հիշատակի օրը ՅՈՒՆԵՍԿՕ-ն եւս ներառել է հատուկ նշվող տոների շարքում:

Ժողովականները ծանոթացան նաեւ Մայր Աթոռ Սուրբ Էջմիածնի 2022 թվականի գործունեության տեղեկագրին: Արձանագրվեց, որ Մայր Աթոռ Սուրբ Էջմիածնի եկեղեցականների ընդհանուր թիվը 721 է՝ 49 արքեպիսկոպոս եւ եպիսկոպոս, 72 կուսակրոն քահանա (ծայրագույն վարդապետ, վարդապետ եւ արեղա), 504 քահանա, 96 սարկավագ: Անցած տարում իրականացվել են հոգեւոր-քարոզչական, կրթական, մշակութային տարբեր ծրագրեր՝ ՀՀ զինված ուժերում, քրեակատարողական հիմնարկներում, կրթական ու մշակութային հաստատություններում եւ համայնքներում:



Հատուկ անդրադարձ կատարվեց 2022 թվականի ընթացքում Մայր Աթոռ Սուրբ Էջմիածնի իրականացրած սոցիալական աջակցության եւ օժանդակության ծրագրերին: Հիշյալ ծրագրերն ուղղված են եղել ի նպաստ զոհված եւ վիրավոր զինվորների ընտանիքների, պատերազմի հետեւանքով Արցախից եւ սահմանամերձ բնա-


կալայրերից տեղահանված ու սոցիալապես ծանր կացության մեջ հայտնված հայորդիների:

Քառօրյա ժողովի ընթացքում քննարկվեցին նաեւ եկեղեցու կանոնական ու հովվական կյանքին, կարգապահական եւ իրավական խնդիրներին, կրթական ծրագրերին եւ եկեղեցու առաքելության

արդյունավորմանը վերաբերող հարցեր:

Ժողովն ամփոփվեց Ամենայն Հայոց Հայրապետի օրհնության եւ գնահատանքի խոսքով:

Լրատվական նյութերը՝ Մայր Աթոռ Սուրբ Էջմիածնի տեղեկատվական համակարգի



Մենք պահք

Հայ Առաքելական Սուրբ Եկեղեցին սահմանել է պահից տարաբնույթ օրեւ օրապահք, շաբաթապահք եւ հատուկ պահք:

Ամենաերկարատեւը Մեն պահքն է. այն տեւում է քառասուն օր՝ մինչեւ Ծաղկազարդի կիրակի, որին հաջորդում է Ավագ շաբաթը: Վերջինիս ընթացքում եկեղեցին նախապատրաստում է հավատացյալ ժողովրդին՝ արժանավորապես եւ մեծագույն երկյուղածությամբ մասնակցելու Սուրբ Հարության տոնին:

Մեն պահքի քառասունօրյա ժամանակահատվածը խորհրդանշում է մեր Տեր Հիսուս Քրիստոսի՝ անապատում պահեցողության եւ փորձության շրջանը: Սկստվելուց հետո Հիսուս «Հոգով անապատ առաջնորդվեց ու քառասուն օր փորձվեց սատանայից: Չկերավ եւ չխմեց այն օրերին...» (Ղուկ. Դ 1-3): Մեր Տեր Հիսուս Քրիստոս իր օրինակով ցույց տվեց պահքի եւ ծոմի կարեւորությունը:

Շատերը պահքը համարում են միայն կենդանական ծագում ունեցող սննդից հրաժարվելու շրջան, սակայն իրականում այն ունի առավել խոր ու հոգեւոր իմաստ, ինչի մասին է վկայում Աստվածաշունչը: Քրիստոս պահքի մասին խոսելիս շեշտում է. «Երբ ծոմ պահեք, տրտմեք մի լինեք կեղծավորների մեջ, որոնք իրենց երեսներն այլանդակում են, որպեսզի մարդկանց այնպես երեւան, թե ծոմ են պահում»:



Ճշմարիտ են ասում ձեզ, այդ իսկ է նրանց վարձը: Այլ երբ դու ծոմ պահես, օծիր քո գլուխը եւ վրձ քո երեսը, որպեսզի չերեւաս մարդկանց որպես ծոմ պահող, այլ քո Հորը՝ գաղտնաբար. եւ քո Հայրը, որ տեսնում է, ինչ որ ծածուկ է, կհատուցի քեզ» (Մատթ. 23 16-18): Քրիստոս ուղղորդում է մարդկանց, սովորեցնում, թե ճշմարիտ հավատացյալն ինչպես պետք է պահք պահի:

Հիսուսի համբարձումից հետո քրիստոնեական համայնքներում սկսեցին սահմանվել պահից շրջաններ, եւ պահքը ներմուծվեց քրիստոնեական կենցաղ:

Արդեն իսկ «Գործք առաքելաց»-ը վկայում է, որ երբ Պողոսն ու Բառնաբասը քրիստոնեական առաջին համայնքների համար երեցներ էին ձեռնադրում, այդ անում էին պահքով եւ աղոթքով. «...Երեցներ ձեռնադրեցին, պահեցողությամբ հանդերձ աղոթք արեցին եւ նրանց հանձնեցին Տիրոջը, Որին հավատացել էին» (Գործք ԺԴ 22):

Պահեցողությունը վերաբերում է ոչ միայն ճաշակելիքին՝ հեռու մնալու ախորժեղի կերակրից, այլ նաեւ բոլոր զգայարաններին: Կերակրից հրաժարվելն անօգուտ է, եթե առաջին հերթին չենք հրաժարվում մեղքից: Այս առնչությամբ Ս. Գրիգոր Տաթևացին ասում է. «Սատանան միշտ պահքի մեջ է, ոչինչ չի ուտում, բայց մեղք գործելուց չի դադարում եւ չի հոգնում»:

Եկեղեցու նշանավոր հայր Բարսեղ Կեսարացին առավել խիստ խոսքերով է արտահայտում իր տեսակետն այս հարցի վերաբերյալ. «Միս չես ուտում, բայց եղբորդ միսն ես ուտում: Գինի չես խմում, սակայն չես հրաժարվում նրա համոզեալ թշնամական վերաբերմունքից»:

Եկեղեցու մյուս հայրերը եւս պահքի մասին խոսելիս շեշտում են, որ առավել կարեւոր է մեղքից հեռու մնալու, ժուժկալությամբ եւ ողորմածությամբ ապրելու սկզբունքը: Ոմանք պահք են պահում, բայց արդյունքում անվարձ են մնում. ինչպես օրինակ՝ երբ ժառոց պահք է պահում, որ դրանք չծախսվի, կեղծավորը՝ զովեստներ ընդունելու, տկարը՝ մարմինը չվտանգելու համար, աղքատը պահում է, քանզի կերակուր չունի: Այսինքն՝ պահեցողությունն իրենց եւ ոչ թե Աստծու համար է, այնինչ պահքը միայն Աստծու փառքի համար է սահմանված (տես *Պողոս պատրիարք Ադրիանապոլսեցի*, Խրատի թանգարան (18-19-րդ դդ.), Ս. Էջմիածին, 2015, էջ 410):

Պահեցողությունը ոչ միայն հոգուն է անհրաժեշտ, այլ նաեւ մարմնին է օգտակար, եւ ամենեւին պատահական չէ, որ նաեւ բժիշկներն են մարմնի առողջության համար հանձնարարում պահք պահել: Ուստի ով տրտնջում է Սուրբ Եկեղեցու սահմանած պահքից ու զեխությամբ անճանառոր լինում կերակուր եւ ըմպելիք ընթրշխնելուն, ոչ միայն հոգուն է վնասում՝ հպատակեցնելով զորավոր կրքերին, այլ նաեւ մարմնին է խեղում՝ ենթարկելով գանազան ախտերի ու հիվանդությունների: Այսինքն՝ եթե առողջ է հոգին, մարմինը եւս առողջ կլինի:

Մեն պահքի շրջանի յուրաքանչյուր կիրա-

կի ունի սուրբգրային որոշակի խորհուրդ: Առաջին կիրակին կոչվում է Բուն բարեկենդան (բոլոր պահքերին նախորդող կիրակիներն անվանվում են բարեկենդան, միայն Մեն պահքին նախորդողն է կոչվում Բուն բարեկենդան, քանի որ նրան հաջորդում է ամենաերկար պահքը), Արտաքսման կիրակի, Անառակի կիրակի, Տնտեսի կիրակի, Դատավորի կիրակի, Գալստյան կիրակի, Ծաղկազարդ: Այսպիսով՝ այս ողջ ընթացքը խորհրդանշում է մարդկության անցած ճանապարհը՝ եղեմական պարտեզից մինչեւ Գողգոթա տանող, այսինքն՝ մարդկության փրկագործության ուղին (տես *Շնորհք արք. Գալուստյան*, Մեն պահքի կիրակիների ոսկե շղթան, Ս. Էջմիածին, 2001, էջ 4):

Մեն պահքը կիսվում է միջինքով, որը նշվում է պահքի 24-րդ օրը: Միջինքից սկսած՝ խաղաղական ժամերգության ընթացքում սկսում են երգվել Ստեղծություններ՝ հավուր պատշաճի: Միջինքը հուշում է, որ պահքի ավարտին մնացել է եւս 24 օր:

Այս օրվա հետ կապված կան ժողովրդական բազմաթիվ ավանդույթներ: Միջինքին է առնչվում ծիսական բաղարջը, որ հայտնի է մի շարք անվանումներով՝ միջունք, մրջնաբաղարջ, կլոճ, կապար եւ այլն: Այն կլորավուն, ուռուցիկ տեսք ունեն, եւ պատրաստում էին ձեթով, մեղրաջրով եւ քիչմիշով: Միջինքի պահից գաթայի մեջ դնում էին ուլունք կամ մետաղադրամ: Այն կտրում էին ըստ ընտանիքի անդամների թվաքանակի, բաժին էին հանում նաեւ ընտանի կենդանիներին եւ հողին: Ըստ ժողովրդական ընկալման՝ ում բաժին էր ընկնում մետաղադրամը, ուլունքը կամ փայտյա խաչը, նրան հաջողություն էր սպասում ողջ տարվա ընթացքում:

Միջինքով չէր ավարտվում պահեցողությունը. այն մույն ձեւով շարունակվում էր մինչեւ Սուրբ Հարության տոնը:

Բուն բարեկենդանից հետո եկեղեցիների վարագույրները փակվում են մինչեւ Ծաղկազարդ: Առաքելական կանոններում եւս նշվում է, որ Մեն պահքը պետք է 40 օր տեւի, որից հետո նշվի Սուրբ Հարությունը:

Մեն պահքը սահմանվել է որպես զղջման, ապաշխարության, ինքնամաքման ժամանակահատված: Քրիստոնյան ճշմարիտ պահքի միջոցով կարող է հասնել փրկության եւ վերագտնել դրախտը, որը նախաձեռնողները կորցրին պահեցողության պատվիրանը խախտելու հետեւանքով. «Գրված է՝ միայն հացով չի ապրի մարդ, այլ՝ այն ամեն խոսքով, որ դուրս է գալիս Աստծու բերանից» (Մատթ. Դ 4):

Շարունակելի

Ընծ պահքի կիրակիները (սկսվում են Բուն բարեկենդանով) ունեն իրենց հատուկ՝ բնորոշող անվանումը: Ուշագրավ է նաև, որ այս կիրակիները, եկեղեցու հայրերի իմաստուն տնօրինությամբ դաստաստվելով կողք կողքի, խորհրդաբանական իմաստով ներքին մի ընդհանրությամբ շաղկապվում են միմյանց: Առաջին կիրակին, որով նշանավորվում է մուտքը դեպի Մեծ պահքի խորհրդավոր ճանապարհորդություն, Բուն բարեկենդանի կիրակին է, որը խորհրդանշում է մախաստեղծների դրախտային երջանիկ կյանքը մախքան մեղք գործելու ու Աստծու փափագելի մեղքախնայուն հոգեկալով:

«Բարեկենդան» նշանակում է «բարի կենդանություն, ողջություն», այսինքն՝ այն երանելի վիճակը, երբ դեռևս միայն բարին էր թագավորում, եւ կարիք չկար մարտնչելու չարի, մարդկային կրքերի ու մեղքերի դեմ: Մեծանուն լեզվաբան Հրաչյա Աճառյանն իր «Հայերեն արմատական բառարանում» «բարեկենդան» բառը բացատրում է որպես «բարի» եւ «կենդանություն» բառերից կազմված բարդածանցավոր բառ, որը նշանակում է «երջանիկ կյանք» (հտ. Ա, Երեւան, 1971, էջ 422): «Նոր բառգիրք Հայկազեան լեզուի» բառարանը որպես օրինակ է բերում Սամուել Կամրջաձորեցու՝ «Բարեկենդան» անվան բացատրությունը. «Բարեկենդանին կիրակին զփափկութիւն դրախտին եւ զբարեկենդանութիւն օրինակէ» (հտ. Ա, Երեւան, 1979, էջ 450): Մարգարիտ արք. Օրմանյանը Բուն բարեկենդանի մասին խոսելիս մեջբերում է նույն այս հատվածը, սակայն փորձում է սույն բացատրությունը կապել սննդի հետ, իսկ եկեղեցական ծիսակարգին անդրադառնալիս կիրառում է «տխրություն» բառը. «Մեծ պահքի ապաշխարության եկեղեցական երգերը եւ վարագույրի փակումը շաբաթ երեկո կատարվելուց հետո, կիրակի օրը եկեղեցական տխրության հետ կերակուրների ուրախությանը նվիրելը, ըստ մեր վարդապետների, «Չփափկութիւն դրախտին եւ զբարեկենդանութիւն օրինակ է», քանի որ Բուն բարեկենդանի կիրակի օրվա խորհուրդը մախահայրերի դրախտային երջանիկ կյանքի հիշատակությունն է պարունակում» (*Մարգարիտ արք. Օրմանյան, Ծիսական բառարան, Երեւան, 1992, էջ 12*): Այլաբանական իմաստով կարելի է նույնիսկ ասել, որ Բարեկենդանը մարդկության առաջին, անապական երջանկությունն էր՝ շնորհված Աստծուց, որ ասում էր. «Աճեցեք, բազմացեք, լցրեք երկիրը, տիրեցեք դրան, իշխեցեք ծովի ձկների, երկնքի թռչունների, ողջ երկրի բոլոր անասունների ու երկ-



Բուն բարեկենդան

րի վրա սողացող բոլոր սողունների վրա... Ահա ձեզ տվեցի ողջ երկրի վրա տարածված սերմանելի բոլոր բույսերի սերմերը եւ իրենց մեջ պտուղ սերմանելու սերմ պարունակող բոլոր ծառերը: Դրանք թող ձեզ համար սնունդ լինեն, իսկ բոլոր կանաչ խոտերը երկրի բոլոր գազանների, երկնքի բոլոր թռչունների եւ երկրի վրա սողացող բոլոր սողունների՝ բոլոր կենդանիների համար թող լինեն կեր» (հմմտ. Ծննդ. Ա 28–30):

Ամեն բան, արարչագործության յուրաքանչյուր տարր պատկանում էր մարդուն եւ ենթակա էր նրան. ահա դա էր այն առաջին երջանկությունը, որի վերհուշն է ասես Բուն բարեկենդանի տոնը: Հիշատակելով եւ հիշելով դրախտային երանավետությունն ու մարդկային անմեղությունը՝ ինքնեւ մեր առջեւ ենք պատկերում երջանկության հասնելու ուղին, որ սկսվում է մեղսականության հաղթահարումով եւ անցնելով այս կյանքի անապատային, ոչ դյուրին ճանապարհով՝ իր ապահով, խաղաղ հանգրվանն է գտնում դրախտային պարտեզում:

Բարեկենդանը, սակայն, ոչ թե պահքի ու տրտմության, այլ ուրախության օր է: Այն ուրախության, որն իրականում քրիստոնեության առաջնքն է: Ցավը, տխրությունն ու տառապանքը չեն, որ բնորոշ են քրիստոնեությանը, այլ այդ տառապանքից ազատագրվելու եւ կատարյալ երջանկության բարձունքին հասնելու մասին է քրիստոնեական ողջ վարդապետությունը: Քրիստոս Ինքն աշխարհ էր եկել քրիստոնյաներիս ցույց տալու ոչ թե տառապանքի, այլ փրկության ու երանության ուղին:

Բուն բարեկենդանի մախորդ օրը՝ շաբաթ երեկոյան, ժամերգության ընթացքում եկեղեցու խորանի վարագույրը փակվում է, խորանը ծածկվում է, եւ այդպես շարունակվում է քառասունօրյա պահքի ընթացքում: Դա խորհրդանշում է Ադամի արտաքսումը դրախտից, այնուհետեւ՝ մինչեւ Ծաղկազարդ, Ավետարանը չի համբուրվում եւ «Հաւատամքի» ու «Կեցցոյի» ժամանակ չի բարձրացվում՝ ի տես ժողովրդի:

Փոխաբերաբար համեմատական զուգահեռներ անցկացնելով՝ կարելի է հիշատակել, որ համաձայն սուրբ հայրերի մեզ ավանդած գրությունների՝ Բարեկենդանը դրախտային փափկության օրինակն է, իսկ դրախտում եղող ծառերն ու բողբոջները խորհրդանշում են եկեղեցու զավակներին: Կենաց ծառը, որը գտնվում էր դրախտային պարտեզի մեջտեղում, Քրիստոսի մախտօրինակն է, քանի որ Նա մույնպես եկեղեցու կենտրոնում է: Իսկ ահա պտղաբեր ծառերն ու բազմազան զույնզույն, անուշաբույր ծաղիկները մախտօրինակն էին առաքյալների, մարգարեների, ավետարանիչների եւ եկեղեցու սուրբ վարդապետների, որոնք, համաձայն Պողոս առաքյալի, «Քրիստոսի բուրմունքն են Աստծու առջեւ» (հմմտ. Բ Կորնթ. Բ 15):

Բուն բարեկենդանը ցույց է տալիս մարդկության՝ այս մարմնեղեն կյանքից դուրս ելնելը, ինչպես Բարեկենդանին հաջորդող օրից սկսած մենք «ելնում» ենք մարմնավոր կերակուրներից, որովհետեւ մինչեւ Սուրբ Հարության տոնն այլեւ չենք ուտելու կենդանական ծագման սնունդ. Սուրբ Հարությունը խորհրդանշում է կյանք մտնելը, քանի որ այդ օրը «ճաշակում ենք» երկնային Գառը, ինչը նշանակում է, որ մենք՝ մեղավոր մարդիկս, Քրիստոսի չարչարանքների միջոցով արժանանում ենք երկնային լուսեղեն խորաններին եւ Տիրոջ անապատում վայելքներին:

ԱճՈՐ ՀՈՎԱՏԵՓՅԱՆ

Շարական Բուն բարեկենդանի

Հորը էակից եւ Սուրբ Հոգուն համագո Բանն Աստված Իր պատկերը միախառնեց մեր հողանյութ բնությանը, Որը փառքով զարդարեց եւ դրեց Պարտեզի մեջ ուրախության:

Այնտեղ մարդը
Անտխրական խնդությամբ ուրախ էր,
Քանի որ տեսնում էր Աստծուն,
Որ միշտ դրախտ էր իջնում,
Եվ Տիրոջ Լույսի ճառագայթը
Մարդու հոգում էր դրոշմվում:

Արդ, ով Աստվածամայր Մարիամ,
Աղբյուրի Միածին Որդուդ,
Որ ավազակի նման
Մեզ եւս արժանի դարձնի
Վերստին ժառանգելու դրախտը վայելչության:

Գրաբարից փոխադրությունը՝ Գեորգ սրկ. ԿԱՐԱՊԵՏՅԱՆԻ



Արտաքսում եղեմական

Ընծ պահքի երկրորդ կիրակին Արտաքսման կիրակին է: Այս կիրակին խորհրդանշում է մարդկության մախաճնողներ Ադամի ու Եվայի՝ դրախտից առժամանակ արտաքսվելը: Եթե Բուն բարեկենդանի խորհրդածությունը կոչված է արթնացնելու մեր հիշողությունը, թե որտեղից ընկանք եւ ինչ պատիվ ու վայելչություն կորցրինք, ապա Արտաքսման կիրակիի խորհրդածությունը նպատակ ունի սթափեցնելու մեզ, որպեսզի գիտակցենք, թե ուր ենք ընկել ու ինչ անպատիվ եւ անվայել թշվառության մատնվել: Այս աշխարհը, արդարեւ, մախամարդու անկումից հետո լոկ աքսորավայր է, ժամանակավոր պանդխտավայր, որտեղ համայն մարդկությունը, հակառակ խաբուսիկ «առաջընթացին», դատապարտված է ապականության, հիվանդության ու մահվան:

Արտաքսման կիրակիի խորհուրդը նկարագրվում է Ծննդոց գրքում. «Եվ Տեր Աստված արտաքսեց նրան բերկության դրախտից, որպեսզի նա մշակի այն հողը, որից ստեղծվել էր: Աստված դուրս հանեց Ադամին, բնա-

կեցրեց բերկության դրախտի դիմաց եւ հրամայեց քերվեցնելն ու բոցեղեն սրին շուրջանակի հսկել դեպի կենաց ծառը տանող ճանապարհները» (Գ 23–24):

Արտաքսման կիրակիի խորհուրդը լավագույնս փոխանցում է շարականագիրը՝ ասելով. «Որ զօրէնս սրբութեան պահոց մախի դրախտին աւանդեցեր, զոր ոչ պահելով մախաստեղծիցն՝ ճաշակմամբ պտուղն ճաշակեցին զդառնութիւն մեղաց եւ մահու. վասն որոյ շնորհեա՛ մեզ, Տէր, ճաշակել զքաղցրութիւն Քոց պատուիրանաց» («Սուրբ պահքի օրերնքը մախ դրախտում ավանդեցիր, սակայն մախաստեղծներն այն չպահեցին, այլ պտուղը ճաշակելով՝ մեղքի եւ մահվան դառնությունը ճաշակեցին, ուստի, Տեր, Քո պատվիրանների քաղցրության ճաշակումը շնորհիր մեզ»):

Արտաքսման կիրակիի շարականը, նկարագրելով եւ հիշեցնելով Ադամի ու Եվայի՝ դրախտից արտաքսվելը եւ մեղավորների՝ Քրիստոսի միջոցով դարձյալ դրախտին արժանի դառնալու հնարավորությունը, մեզ ուղղորդում է կրկին վերադառնա-

լու այնտեղ եւ այդ ճանապարհին որպես առաջնորդ է կարգում պահեցողության ու ապաշխարության սրբազան խորհուրդը: Հիրավի, Տերը դեռեւս դրախտում էր հաստատել պահքի սրբազան օրերը, սակայն մեր մախաճնողները չպահեցին այն՝ արգելված պտուղն ուտելով եւ այդպես ճաշակելով մեղքի ու մահվան դառնությունը, ուստի մեզ մնում է միայն Տիրոջն աղերսել իր շնորհների ու քաղցր պատվիրանների ճաշակմանն արժանացնել մեզ՝ մարդասիրաբար բժշկելով մեր մեղքով հիվանդ եւ ցավազար հոգիներն ու մարմինները բազմազան հիվանդություններից ու ողջ աղտեղությունից:

Միով բանիվ՝ ապաշխարության փրկարար խորհուրդն է ամփոփված Արտաքսման կիրակիի խորհրդի մեջ, ինչի մասին է վկայում նաեւ օրվա «Հարց» շարականի հետեւյալ հատվածը. «Կյանքի դրախտից ելնելու համար [մեղ] մախահոր տրտմության հետ մենք էլ ընդունենք ապաշխարության տրտմությունը, որպեսզի Քրիստոսի հարկությամբ եկեղեցու դրախտը մտնելուն արժանանանք»:

Գեւորգ Դ Կոստանդնուպոլսեցու հայրապետության շրջան (1866–1882 թթ.)

Սրբալույս մյուռնի օրհնությունը Հայ Եկեղեցու մեծաշուք եւ մկրակաւ արարողություններից է, որը կատարվում է Ամենայն Հայոց Հայրապետի ձեռամբ: Այն ունի ինչպես կրոնական, այնպես եւ ազգային վսեմ ու խորհրդավոր նշանակություն: Մյուռնի օրհնության ժամանակ Մայր Աթոռում հավատավոր ժողովրդի ներկայությունը, հայ քրիստոնյայի ջերմեռանդությունը մեկ անգամ եւս վկայում են, որ մեր ազգն անքակտելիորեն կապված է հայոց հոգեւոր կենտրոն Սուրբ Էջմիածնին: Հիշատակությունների համաձայն՝ մյուռնի օրհնությանը ներկա լինելու համար աշխարհի տարբեր վայրերից Սուրբ Էջմիածին էին գալիս հազարավոր հայորդիներ. գալիս էին Սուրբ Աթոռ՝ իրենց հավատքը նորոգելու, իսկ ոմանք էլ՝ կեղեքող հիվանդություններից բժշկվելու: Անգամ պատերազմների, քաղաքական արգելքների պայմաններում մյուռնի օրհնությանը մասնակցում էին բազմահազար հավատավոր հայորդիներ Էջմիածնից ու շրջակա գյուղերից, երեւանից:

1868 թ. Գեւորգ Դ Կոստանդնուպոլսեցու անմիջական տնօրինությամբ եւ օրհնությամբ սկսում է լույս տեսնել «Արարատ» ամսագիրը: Մայր Աթոռի պաշտոնական ամսագրում ուշագրավ տեղեկություններ եւ նկարագրություններ են պահպանվել մյուռնի օրհնության վերաբերյալ: Գեւորգ Դ Կոստանդնուպոլսեցուն բախտ է վիճակվում իր հայրապետության ընթացքում չորս անգամ մյուռնի օրհնել՝ 1868, 1872, 1878 եւ 1882 թվականներին: 1868 թ. սեպտեմբերի 29-ին՝ Վարազա Սուրբ Խաչի տոհմ, Գեւորգ Դ կաթողիկոսը կատարում է սրբալույս մյուռնի՝ իր անդրանիկ օրհնությունը: Արարողությունից դեռեւս երկու շաբաթ առաջ սկսվել էր ուխտավորների հոսքը դեպի Սուրբ Էջմիածին: Ուխտավորներ էին եկել Կարինից, Վանից, Երզնկայից եւ Դարսից: Վանեցի ուխտավորներին առաջնորդում էին Սկրտիչ վրդ. Խրիմյանը եւ Երեմիա վարդապետը, իսկ դարսեցիներին՝ Գրիգորիս վարդապետը: Նաեւ Թիֆլիսից, Գորիքից, Նոր Նախիչեւանից, Արցախից, Հին Նախիչեւանի գավառներից, Երեւանից, Ալեքսանդրապոլից, Ախալցխայից էին եկել մյուռնի օրհնությանը մասնակցելու համար («Հանդես օրհնութեան սրբալույս իւղոյն միւռնի», «Արարատ»,

1868, էջ 58–60): Մայր Աթոռի հյուրանոցը, վարժատունն ու միաբանների սենյակները լցվել էին ուխտավորներով, անգամ հատուկ վրաններ էին դրվել պարիսպներից դուրս: Համաձայն «Արարատ» ամսագրի՝ «...հեռաւոր տեղերէ դիմեցին յԱթոռս ի տես հանդիսի օրհնութեան սրբալոյս միւռնի եւ յարժանաւորութիւն շնորհաց Հոգւոյն Սրբոյ ի ձեռն աղօթից եւ խնդրուածոց առ Աստուած վասն շինութեան աշխարհի եւ հաստատութեան սրբոյ Եկեղեցւոյ. ճանապարհի նեղութիւնը, երկարութիւնը, ոչ ինչ էր նոցա հոգեկան ջերմեռանդութեան յառաջը, իսկ Աթոռոյ մէջ շաբաթներով մնալը՝ աւելի ուրախութիւն...» (անդ, էջ 61):

Այս մյուռնի օրհնության մասին ուշագրավ տեղեկություններ ենք քաղում արարողության մասնակից Կիրակոս Դազանչյանի «Ուխտավորի նամակներ» երկից: Հեղինակը 1868 թ. արեւմտահայ ուխտավորների մի խմբի հետ Սուրբ Էջմիածին էր եկել՝ այս նշանակալի իրադարձությանը ներկա լինելու: Նրանց խումբը Սուրբ Էջմիածին է հասնում սեպտեմբերի 23-ին: Այդ ժամանակ ամբողջ Վաղարշապատն արդեն լցված էր Պարսկաստանից, Թուրքիայից, Ռուսաստանից եկած ուխտավորներով, որոնց թիվը հասնում էր 30000-ի, ուստի նրանք մնում են անօթեւան: Երբ Գեւորգ Դ Կոստանդնուպոլսեցին տեղեկանում է հեռավոր երկրներից եկած ուխտավորների մասին, իսկույն իրամյում է դատարկել Գեւորգյան ճեմարանն ու մի մասը հատկացնել կարնեցիներին ու երիզացիներին, իսկ մյուս մասը՝ քարբերոցիներին ու տիգրանակերտցիներին (Կ. Դազանչյան, Ուխտավորի նամակներ, «Էջմիածին», 2008, Թ, էջ 88–89):

1872-ի մայիսի 21-ի մյուռնի օրհնությունը համընկնում է Գեւորգ Դ Կոստանդնուպոլսեցու կաթողիկոսական օծման հինգերորդ ամյակի հետ: Օրհնության օրը «...ամենայն հայոց սիրտը ի թունդ կբաբախէին եւ բոցավառ ի խանդ կանձկային նոյն հանդիսի տեսութեան եւ շնորհացն մասնակցութեան, այլ առ այնչափ բազմութեան անձկութիւն Տաճարիս կճմէին մեր Վեհ Հայրապետի» («Հանդես սուրբ միւռնի օրհնութեան», «Արարատ», 1872, էջ 207): Դեռեւս մյուռնի օրհնությունից մեկ տարի առաջ Սուրբ Էջմիածնի սինոդը Մայր Աթոռ եկող բարե-



պաշտ ուխտավորների ուղեկցող էր նշանակել վաղարշապատցի Պետրոս Վասակյանցին («Մյուռնի օրհնությունը ժԹ–ԻԱ դարերում (Փաստաթղթերի նյութերի ժողովածու, աշխ.՝ Ասողիկ քին. Կարապետյանի, Գ. Ավագյանի, Ս. Էջմիածին, 2015, էջ 138): Արարողությանը ներկա էին նաեւ կառավարության անդամներն ու Երեւանի նահանգապետը («Հանդես սուրբ միւռնի օրհնութեան», «Արարատ», 1872, էջ 208–209):

1872 թ. մյուռնի օրհնությունը նկարագրել է նաեւ Վահան Ծ. վրդ. Բաստամյանցն իր օրագրական աշխատության մեջ. «Այսօր կատարուեցաւ Ս. Էջմիածնի տաճարում սուրբ մեռնի օրհնութեան հանդէսը սբանչելի եկեղեցական եւ արտաքին շքեղութեամբ եւ մեծափառ վայելչութեամբ... մինչեւ 15 հազար ժողովուրդ աշխարհի ամենայն կողմերից գումարուել էին՝ սուրբ հանդիսին ներկայ գտնուելու համար...» («Տարեգրություն (Ս. Էջմիածին 1872–1880 թթ.)», աշխ.՝ Գեորգ Տեր-Վարդանեանի, Ս. Էջմիածին, 2018, էջ 76):

1878 թ. հունիսի 4-ին երջանկահիշատակ Գեւորգ Դ հայրապետը երրորդ անգամ է մյուռնի օրհնում: Մյուռնը պետք է օրհնվեր 1877-ի աշնանը. ռուս-թուրքական պատերազմը պատճառ դարձավ, որ արարողությունը հետաձգվի: Այս անգամ Սուրբ

Աթոռում հավաքվել էին միայն երեւանի ու Էջմիածնի հայորդիները, որոնց թիվն անցնում էր 10 000-ից («Սուրբ միւռնի օրհնութեան հանդէս», «Արարատ» 1878, էջ 273): Քաղաքական հանգամանքներից ելնելով՝ այս նշանակալի տոնախմբությանը չկարողացան մասնակցել հայկական գաղթօջախների՝ Հայ Եկեղեցու հավատավոր զավակները:

1880 թվականից Գեւորգ Դ Կոստանդնուպոլսեցին տկարացած եւ ուժասպառ էր, սակայն կարողացավ 1882-ի մայիսի 9-ին եպիսկոպոս ձեռնադրել, իսկ նույն ամսի 16-ին՝ Հոգեգալստյան տոնի օրը, վերջին անգամ մյուռնի օրհնել, ինչպես Մեսրոպ արք. Աշնյանն է գրում. «...երբ տակաւին կրնար առնական ձայնիւ օրհնել եւ բարձրածայն երգել» («Էջեր Հայ Եկեղեցւոյ պատմութենէն», Երեւան, 1994, էջ 86): Օրհնության հանդեսին մասնակցելու համար դեռեւս մայիսից սկսվել էր ուխտավորների հոսքը Ռուսաստանից, Պարսկաստանից, Արեւմտյան Հայաստանից եւ հեռավոր այլ վայրերից: Օրհնության նախընթաց օրը Ս. Էջմիածնի ոչ միայն հյուրատներն ու միաբանական սենյակներն էին լցվել ուխտավորներով, այլ նաեւ՝ խցերն ու տնակները: Վաղարշապատում չկար մի տուն, որտեղ իջեւանած չլիներ 15–20 ուխտավոր: Համաձայն «Արարատ» ամսագրի հաղորդած տեղեկությունների՝ «...տակաւին Վաղարշապատի հրապարակներն ու փողոցները կկխտային արանց, կանանց, մեծաց եւ փոքունց հայ որերոյ խումն եւ խիտ բազմութեամբ տեղական եւ շրջակայ գիւղօրէից բնակչօք հանդերձ, որոց ամենից թիւը հաւանականագոյն էր կարծել, որ երեսուն հազարից աւելի էր» («Սուրբ միւռնի օրհնութեան հանդէս», «Արարատ», 1882, էջ 210): Մյուռնի օրհնության ընթացքում կարգ ու կանոն պահպանելու համար Երեւանից եկել էր 250 հոգուց բաղկացած բանակ: Ա. Այվազյանի՝ 1882 թ. «Արձագանք»-ում հրատարակված հոդվածի համաձայն՝ Վաղարշապատի ծերերի եւ միաբանների վայրայությամբ՝ Սուրբ Էջմիածնում երբեւէ այսքան ուխտավորներ չէին եղել («Հանդես օրհնութեան սուրբ միւռնի», «Արձագանք», 1882, թիւ 15, էջ 226):

Արամայիս սրկ. ԱՁԻՉՅԱՆ

պարտեզից

Արտաքսման կիրակիի ընթերցումներում, որոնք Սուրբ Հոգու իմաստուն առաջնորդությամբ մեզ համար սահմանել են Եկեղեցու հայրերը, աղերսանքներ են՝ ուղղված Աստծուն. «Տէր, ողորմիր մեզ, քանզի մենք մեր հույսը դրել ենք Քեզ վրա» (Ես. ԼԳ 2): Եվ ապա մարգարեն ամփոփում է իր խոսքն այս հոգեցունց խոստովանությամբ. «Տերն է մեր Հայրը, Տերն է մեր Դատավորը, Տերն է մեր Իշխանը, Տերն է մեր Թագավորը, Տերն է մեր Փրկիչը, Նա է փրկելու մեզ»: Պողոս առաքյալն էլ հորդորում է ոչ միայն պահքի մարմնական ճիգով պատրաստել մեր մարմինները որպէս «կենդանի, սուրբ, աստվածահաճո զոհ», այլեւ չկերպարանվել «այս աշխարհի կերպարանքով» եւ նորոգվել «մտքի նորոգությամբ» (հմմտ. Հռոմ. ԺԲ 1–2):

Այնուհետեւ առաքյալը մեզ է ավանդում քրիստոնեության թերեւս կարեւորագույն ուսուցումներից մեկը. «Սեր առանց կեղծիքի. ատելով չարը՝ ընթանալ բարու հետեւից, եղբայրասիրության մեջ միմյանց հանդէպ լինել գթասիրտ, պատիվ տալու մեջ

միմյանց գերազանցել, ջանասիրության մեջ չլինել թուլասիրտ. հոգով եռացեք, Տիրոջը ծառայեք, հույսով ուրախացեք, նեղության համբերեք, հաճախակի աղոթեք, հաղորդակի՛ց եղեք սրբերի կարիքներին, հետամն՛ւտ եղեք հյուրասիրության:

Օրհնե՛ք ձեզ հալածողներին. օրհնե՛ք եւ մի՛ անհիծեք. ուրախացողների հետ ուրախանալ, լացողների հետ լալ: Համերաշխ եղեք միմյանց հետ, մի՛ մեծամտացեք, այլ խոնարհ եղեք խոնարհների հանդէպ. դուք ձեզ իմաստունի տեղ մի՛ դրեք, մեկի չարի փոխարեն չար մի՛ հատուցեք, խորհե՛ք բարին բոլոր մարդկանց առաջ, ինչ չափով հնարավոր է ձեզ համար, բոլոր մարդկանց հետ խաղաղությո՛ւն պահեք... Թույլ մի՛ տուր, որ չարը հաղթի քեզ, այլ բարիով հաղթիր չարին...» (Հռոմ. ԺԲ 9–18, 21): Առաքյալն իր խոսքն ամփոփում է այս հոգեմորոգ վերջաբանով. «Եվ ոչ ոքի պարտապան մի՛ մնացեք, բացի միմյանց սիրելուց, քանի որ ով սիրում է ընկերոջը, կատարում է օրենքը: Մի՛ շնացիր, մի՛ սպանիր, մի՛ գողացիր, սուտ մի՛ վկայիր, մի՛ ցան-

կացիր եւ ուրիշ ինչ պատվիրան էլ որ կա, այս խոսքի մէջ է բովանդակվում, թե՛ սիրի՛ր քո ընկերոջը, ինչպէս քո անձը. սերն իր ընկերոջը չար բան չի անի. սերն է օրենքի լուրնը...» (Հռոմ. ԺԳ 8–10):

Արդարեւ մեր Տեր եւ Փրկիչ Հիսուս Քրիստոսի մարդեղությանը ու հարությանը է ողջ մարդկության առջեւ վերստին բացվում դրախտի այդքան փափագելի ճանապարհը, որով անխտոր ընթանալու համար Եկեղեցին կոչ է անում մերժել ամեն տեսակի մեղք եւ անօրեցունք, աղոթքով ու ապաշխարությամբ պահք պահել՝

համաձայն Ս. Հովհան Մանդակունու խոսքի. «Արդեն իսկ մարդուն ստեղծելիս Աստված պահքի պնդությամբ պարսպեց մեր բնությունը եւ առաջին մարդուն որպէս առաջին պատվիրան տվեց պահքի պնդությունը՝ չճաշակել չարի եւ բարու գիտության ծառից: Քանզի եթե պահեր պահքի պատվիրանը, կժառանգեր անախտ, անմահ եւ անմեղ կյանքը եւ երկնքում՝ երկնային բարիքները, քանի որ շատերը, ովքեր պահեցին պահքի պնդությունը, փրկվեցին բազում վշտերից» («Թուղթ պահքի պնդության մասին»):

Ուրեմն, ըստ Քրիստոս Աստծու փրկչական խոսքի՝ «Արդ, կատարյալ եղեք դուք, ինչպէս որ ձեր երկնավոր Հայրն է կատարյալ», կատարելության ճանապարհով դեպի երկինք, դեպի կրօնայալ դրախտը վերընթանալու հույսով է, որ քրիստոնյաները պետք է լուսավորեն այս աշխարհային պանդխտության իրենց ուղին՝ վերադառնալու համար այն բերկրալի օթեւանը, որից առժամանակ արտաքսված է մարդ էակը:

ԱճՆԱ ՀՈՎԱՍԵՓՅԱՆ

Սուրբ Աստված, սուրբ եւ հզոր

Սուրբ Աստված, սուրբ եւ հզոր,
Իմ աղերսանքին՝ կույր ու մեղավոր,
Որպէս պատասխան, իբրեւ հատուցում՝
Թող ինձ չդառնա հայացքդ սաստող,
Այլ լրջաւ շնորհիր, Լոյս եղիր ինձնում,
Որ մառախուղվի խավարն իմ անշող...

Եվ թող ի տրիտուր
Իմ պաղատանքի՝ անարժան ու թյուր,
Ինձ լուրջութեամբ չմխիթարի,
Այլ Սէրը Քո բյուր,
Ո՛վ Մարդասերդ մարդասերների...

Ու ի սփոփություն մեղավոր լացիս՝
Թող չընդդիմանի չարչարանքդ ինձ,
Այլ արտասուքիդ կաթին անհատույց
Շողախվի տոչոր մեղքին իմ անիղծ...

Եվ բյուրադական իմ շուրթերով պիղծ
Թող սրբությունդ քարոզվի անահ,
Ու Քեզ համբարձվող աղոթքն իմ աննինջ
Ամենայն չարիք ու մեղք ուրանա
Հանուն սուրբ Խաչի Քո ամենախնա,
Սուրբ Աստված, սուրբ եւ անմահ...

Գեւորգ սրկ. ԿԱՐՎՊԵՏՅԱՆ

Ընծ պահքի երրորդ կիրակին կոչվում է Անառակի կիրակի: Այն առնչվում է Հիսուս Քրիստոսի պատմած «Անառակ որդու առակին» (տե՛ս Ղուկ. ԺԵ 11–32), որը Նոր Կտակարանի գոհարներից է: Ըստ էության՝ առակը բովանդակում է Ավետարանի հիմնական ուսուցումները, ուստի սույն պատումը հաճախ անվանվում է «Ավետարան Ավետարանի մեջ»: Անառակ որդու առակը զետեղված է միայն Ղուկասի Ավետարանում: Այս փոքրիկ հատվածում նկարագրվում են մեղսալից կյանքով ապրող անառակ որդու զոջումը եւ ապաշխարությամբ վերստին հոր գիրկը դառնալը:

Հիսուս Քրիստոս, յուրաքանչյուրին հորդորելով ապաշխարել, պատմում է մի մեծահարուստ մարդու մասին, որը երկու որդի ուներ: Նրանցից կրտսերը, հորից պահանջելով նրա ունեցվածքի իր բաժին ժառանգությունը, այն վաճառում է եւ ստացված գումարը վատնում հեռավոր մի երկրում: Շուտով ցուփ ու շվալտ կյանքը նրան հասցնում է ծայրաստիճան չքավորության: Անբարո եւ իմաստազուրկ կյանքով ապրող, անիրատես անառակ որդին կարճ ժամանակ անց վերջնականապես մատնվում է թշվառության: Վատնելով հայրական ունեցվածքի իր բաժինը՝ ստիպված ծառայության է անցնում որպես խոզապահ, որին արգելված էր մոյսնիսկ եղջերենու՝ կենդանիների տրվող պտուղն ուտել:

Անառակ երիտասարդը, լքված ու զրկված հայրական երանելի ջերմությունից, ճաշակում էր միայնության դառնությունը: Անձկությամբ պարուրված եւ օտար երկրի ազարակուն խոզերով շրջապատված կրտսեր որդին, վերիիշելով իր նախկին հարմարավետ կյանքը, երբ վայելում էր հայրական ապահով ու խաղաղ հոգածությունը, ավստսանքով ասում է. «Քանի վարձու աշխատավորներ կան իմ հոր տանը, որ առատ հաց ունեն, եւ ես այստեղ սովամահ կորչում եմ: Վեր կենամ գնամ իմ հոր մոտ եւ նրան ասեմ. «Հայր, մեղանչեցի երկնքի դեմ ու քո առաջ եւ այլեւս արժանի չեմ քո որդին կոչվելու, ինձ վերցրու իբրեւ քո աշխատավորներից մեկը» (Ղուկ. ԺԵ 17–19): Օտարության մեջ սեփական կյանքը նրա համար իրապես դարձել էր թշվառ եւ մեղսալի: Դրամի վերածած այն հարստությունը, որն Անառակն իր հետ «հեռու աշխարհ» էր տարել, հիրավի, մարդկային ժառանգական օրենքով իրեն էր պատկանում, բայց Աստծու օրենքով՝ ոչ. նա չէր դրա արժանի տերը: Նա քրտինքի կաթիլ անգամ չէր թափել այն վաստակելու համար: Ուրիշների չարչարանքով ստեղծված հարստությունը վերցնելն ու անառակների հետ մխելը, մոխրի վերածելը համազոր էր ավազակության եւ հափշտակության: Միայն ունեցվածքը չէ, որ վատնեց Անառակը, այլ նաեւ իր մարմնական ու հոգեկան կարողությունները:

Անառակ որդին վատնեց նաեւ իր «երիտասարդությունը»՝ պարզելներից ամենացանկալին, իր անմեղությունը՝ հատկություններից ամենահամակրելին, եւ, վերջապես, իր ընտանեկան երջանկությունը՝ փափագելի բարիքներից գերազույնը»:

Անառակ որդին ուժասպառ, մեղքի ծանր լծի տակ կքած, խոր զոջումով, բայց սրտի խոնարհ քաջությամբ վերադառնում է տուն:

Մինչ նա հեռվում էր, հայրը տեսնում է նրան եւ գթածությամբ պարուրվում: Վեր կենալով՝ նա վագում է որդուն ընդառաջ, զրկում եւ համբուրում նրան: Իսկ որդին ասում է հորը. «.....մեղանչեցի երկնքի դեմ եւ քո առաջ, այլեւս արժանի չեմ քո որդին կոչվելու» (Ղուկ. ԺԵ 21): Գթասիրտ հայրն անսահման ներողամտություն է ցուցաբերում եւ ի պատասխան ավագ որդու տրտունջին՝ թե ինչու է ուրախությամբ եւ պատվով ընդունում հայրական ունեցվածքը գեխաբար վատնած անառակին, ասում է. «.....քո այս եղբայրը մեռած էր եւ կենդանացավ, կորած էր եւ գտնվեց» (Ղուկ. ԺԵ 32): Ահա այս պատասխանի մեջ է ամփոփված առակի բարոյաբանական ողջ իմաստը: Այն մեզ խրատում է, որ հոգեւոր նորոգությամբ, ճշմարիտ զոջմամբ եւ գիտակցված ապաշխարությամբ յուրաքանչյուրս կարող ենք մխիթարվել Աստծու հայրական գթառատ սիրով եւ ողորմածությամբ, հյուրընկալվել Նրա հավիտենական արքայության մեջ եւ մասնակցել մեծ խնջույքին:

Առակն ավարտվում է, եւ չգիտենք՝ արդյոք ավագ որ-



Անառակ որդու վերադարձը

դին մտավ խրախճանքի սրահ, թե՛ ոչ: Առակի երկրորդ մասի վերջաբանը խորհրդավոր կերպով բաց է թողնված, եւ այսպես է արտահայտված Ավետարանի գերագույն իմաստությունը: Հաջորդ քայլը վերապահված է մարդու կամքին. եթե ցանկանա, կմտնի ու կմասնակցի խրախճանքին, իսկ եթե ոչ, իրեն կզրկի այդ ուրախությունից:

Առակում հայրը խորհրդանշում է երկնավոր Հոր, անառակ որդին՝ մեղսագործ մարդկության, հայրական տունը՝ Եկեղեցու, օտար աշխարհի գնալը՝ Աստծուց հեռանալու եւ մեղքին տրվելու, ստացած հայրական ժառանգությունը վատնելը՝ աստվածային շնորհից մեղքի հետեւանքով զրկվելու, սաստիկ սովը՝ ոգու անմխիթար սովի, որն աստվածային իմաստության եւ առաքինի վարքի պակասությունն է, աստվածային անճառ խոսքին ու շնորհին վերստին անհագուրդ ձգտելը, ինչպես մարգարեն է ասում. «Ահա օրեր պիտի գան,— ասում է Տեր Աստվածը,— եւ ես սով պիտի ուղարկեմ այդ երկիրը, ոչ թե հացի սով կամ ջրի ծարավ, այլ Տիրոջ խոսքը լսելու սով» (Ամոս Ը 11): Ավագ որդու մասին հիշատակությունը սերտորեն փոխկապակցվում է նաեւ այն հրեաներին, որոնք զայրույթ եւ վրդովմունք էին արտահայտում, երբ Հիսուս Քրիստոս սեր է ողորմածություն էր ցուցաբերում մեղավորների ու հեթանոսների հանդեպ. նրանք, որպես Հին Ուխտի ներկայացուցիչներ, «հրաժարվում էին երկնքի արքայություն մտնելուց»:

Սատանան, կամենալով անհուսորեն վշտացնել անառակ որդուն, նրան ուղարկում է խոզեր պահելու: Սատանայի ազարակն այն վայրն է, որտեղ կան բազմաթիվ ծառեր, որոնք, սակայն, երկնավոր Հայրը չի տնկել, եւ որտեղ կան խոզեր, որ կոխկրտում են մարգարիտը: Կրտսեր որդին խոզեր էր պահում, այսինքն՝ այնպիսիներին, որոնք մարմնական ցանկություններին են հագուրդ տալիս եւ անհույս զլորվում մարդկային թշվառ ժամտահոտության մեջ, այնպիսիներին, որոնք պիղծ հոգով են լցված եւ պարարտացնում են մարմինը, բայց ոչ՝ հոգին, քանզի խոզը բղջախոհների ու մարմնապաշտների խորհրդանշն է: Դեւերը մղում են բղջախոհության, քանզի այն մարդուն լիովին հեռացնում է Աստծուց եւ զրորում եղծելի կյանքի անդունդը. պատահական չէ, որ դեւերը խնդրեցին Տիրոջը թույլ տալ բնակվել խոզերի մեջ (հմմտ. Մատթ. Ը 31):

Գրկաբաց ընդունելով տուն դարձած որդուն՝ հայրն ասում է. «Անմիջապես հանեք նրա նախկին պատմուճանը եւ հագցրեք նրան, մատանին նրա մատը դրեք եւ նրա ոտքերին՝ կոշիկներ. բերեք պարարտ եզր, մորթեք, ուտե՛նք եւ ուրախ լինե՛ք...» (Ղուկ. ԺԵ 22–23): Վերջին խոսքերը խորհրդանշում են Հայր Աստծու կողմից Իր միածին Որդուն՝ որպես անուշահոտ զոհ եւ պատարագ, երկիր ուղարկելը՝ ի քավություն համայն մարդկության մեղքի: Նախկին պատմուճանը հագցնելը խորհրդանշում է անառակի զոջմամբ եւ ապաշխարությամբ արժանի է դառնալն այն լուսեղեն պատմուճանին, որ Ադամն ու Եվան մինչեւ պատվիրանազանցությունը կրում էին դրախտում՝ Աստծու անմիջական ներկայության եւ խնամքի ներքո: Նույնը վերաբերում է կոշիկներին ու մատանուն. կոշիկները խորհրդանշում են հավատի ամրությունն ու զորությունը, քանի որ օձը՝ սատանան, գայթակղիչ է, մարդու գարշապարն է խայթում: Ուստի որքան ամուր լինի կոշիկը, այնքան մարդն ավելի հաստատուն հավատով կդիմակայի գայթակղության անսպասելի խայթոցին: Ս. Գրիգոր Տաթևացին շեշտում է, որ ստրուկներն իրավունք չունեին կոշիկ հագնելու եւ մատանի կրելու: Ուստի դրանք Անառակին տալը խորհրդանշում է մեղքի ստրկությունից նրա ազատագրվելը: Մատանին խորհրդանշում է նաեւ թագավորական իշխանությունը: Ինչպես դամբ, այնպես եւ մատանու վրա որպես կնիք պատկերվում էր թագավորը, հետեւաբար մատանու համձնելը խորհրդանշում է աստվածային պատկերի վերականգնումը, որը խաթարվել էր Ադամի ու Եվայի անհնազանդությամբ: Մարդը երկար չմնաց դրախտում. պատվիրանազանցությունից անմիջապես հետո արտաքսվեց: Չկա Աստծուց հեռու որեւէ տեղ, քանզի Նա ամենուր մեզ հետ է, այլ պարզապես մահացու մեղքն է մարդուն հեռացնում Արարչից. «Ես մերձավոր Աստված եմ եւ ոչ թե հեռավոր» (Երեմ. ԻԳ 23), նաեւ՝ «Ձեր մեղքերն են պատմե՛ք դարձել ձեր եւ Աստծու միջեւ» (Ես. ԾԹ 2):

Կյանքում բոլորս էլ քիչ թե շատ նմանվում ենք անառակ որդուն, քանզի մարդը սխալական է իր բնությամբ: Մեղքերը ծանր քարի նման ճնշում են մեր խիղճը եւ մեզ հեռացնում Աստծուց: Անառակ որդին չունի անհրաժեշտ հատկություն եւ կյանքի փորձառություն, սակայն կարողացավ իր մեջ ուժ գտնել ու վերադառնալ: Մեր երկնավոր Հայրն սպասում է բոլորին. Նա արդարացիորեն միշտ էլ բարեգութ է եւ ողորմածաբար Իր գիրկն է ընդունում բոլոր զոջացողներին, քանզի Աստված «մեղավորների մահը չի ցանկանում, այլ բոլորիս փրկությունը», ինչպես որ Քրիստոս Իր քարոզչության սկզբում ասաց. «Ես չեմ եկել արդարների կանչելու, այլ մեղավորներին՝ ապաշխարության» (Ղուկ. Ե 32): Սիրոն արք. Մանուկյանն ասում է. «Աստված Հայրն է բոլոր անառակ որդիների, որոնց դարձին եւ զոջմանն է սպասում, որպեսզի նրանց զրկի եւ համբուրի: Ո՛վ հավատացյալ, Տերը քեզ է սպասում, գնա՛, մետվիր Նրա գիրկը եւ խոստովանիր. «Հայր, մեղանչեցի երկնքի եւ քո առաջ»: Դրանից հետո Նա սիրո ժպիտով քեզ կդիմավորի, կզրկի եւ հայրական սիրո ու ներման համբույրներ կդրոշմի ճակատիդ»:

Հայկ սրկ. ՍԱՐԳՅՈՒՆ
ԵԼԵՆԱ ԱՐԱՍՆՆՅԱՆ



Շարական Անառակի կիրակիի

Լույսից Լույս, Ծնունդ եւ Ծագում,
Որ եկար փնտրելու ոչխարի նման մոլորված մարդկությանը.
Որ խաչիդ հետ ուսիդ առար,
Մաքրիր մեզ մեր մեղքերից:

Սրբերի Սուրբ եւ Եակներին սրբացնող,
Որ տունդ ավլեցիր՝ աշխարհը մեղքից մաքրելով,
Նրանում Քո պատկերը գտար եւ նորոգեցիր,
Մեզ էլ նորոգիր հնացած մեղքերից:

Անառակ որդու հետ Քեզ ենք կանչում, Հայր գթած,
Մեղք գործեցինք երկնքի դեմ եւ Քո առաջ, Քավիչ հանցանքների,
Ընդառաջ արի սիրով, զրկիր, համբուրիր
Մեզ մեր մեղքերից մաքրելու համար:



ԴԻՄԻՏՐԻ ԼԻՍԱՋՈՎ ՆԱՄԱԿՆԵՐ ԲԱՐՈՒ ՄԱՍԻՆ

Սկիզբը՝ 2022-ի թիվ 19–2023-ի թիվ 4



Նամակ քսանիններորդ
ճԱՆԱՊԱՐԴՈՐԴԵՔ

Կյանքի մեծագույն արժեքներից մեկն ուղեւորություններն են հայրենի երկրում եւ օտար երկրներում: Ընդ որում՝ զգուշացե՛ք ուղեւորությունները հետաքրքիր եւ անհետաքրքիր բաժանելուց, իսկ վայրերը, որոնք այցելել եք, կարելորի եւ անկարելորի: Նույնիսկ ձեր այցելած վայրերի կարեւորության աստիճանն աշխատե՛ք չորոշել: Ուղեւորությունները բաժանե՛ք այնպիսիների, որոնց նախապատրաստվել էիք, եւ այնպիսիների, որոնց չէիք պատրաստվել կամ վատ էիք պատրաստվել: Ցանկացած քաղաք, ցանկացած երկիր, ցանկացած վայր, ուր ուղեւորվելու համար չէք պատրաստվել, անհետաքրքիր եւ ծանծրայի է: Եվ ընդհանրապես՝ եթե գիտեք վայրի պատմությունը, այն տասնապատիկ ավելի հետաքրքիր է դառնում:

Ինչ է նշանակում պատրաստվել ուղեւորության դեպի անծանոթ քաղաք. քաղաք, որտեղ դեռեւս չէք եղել: Նշանակում է ուսումնասիրել դրա պատմությունը, իմանալ դրա հատակագիծը՝ թեկուզե՛ք զբոսաշրջային գծապատկերի ձեւով, քարտեզի վրա նախապես նշել բոլոր այն վայրերը, որոնք պետք է այցելել, եւ մոտավոր երթուղիները՝ ժամանակ չկորցնելու համար:

Բաց մի թողե՛ք հետաքրքիրը գտնելու հնարավորությունը նույնիսկ այնտեղ, որտեղ ձեզ թվում է, թե անհետաքրքիր է: Երկրի վրա անհետաքրքիր վայրեր չկան. կան միայն չհետաքրքրվող մարդիկ՝ հետաքրքիրը գտնել չկարողացող, ներքուստ ծանծրայի մարդիկ:

Ինձ համար միշտ տիպ է եւ այն մարդիկ, որոնք այցելելով իրենց համար նոր վայրեր՝ ծանծրացող տեսքով ասում են իրենց ուղեկիցներին. «Իսկ ահա ես եղել եմ Փարիզում... այսպիսով այնտեղ...»: Պետք է կարողանալ ընկղմվել այն վայրի մթնոլորտի մեջ, որտեղ ձեզ մտնել է ճակատագիրը, եւ ամենուր կարողանալ գտնել իրենը, սեփականը, բնորոշիչը: Այս կարողությունը, իհարկե, տրվում է ոչ միայն վերացական ցանկությամբ, այլ նաեւ գիտելիքներով: Եվ հատկապես կարելու եւ այն գիտելիքները, որոնք ձեռք են բերվել մինչև ուղեւորությունը:

Միշտ հետաքրքիր են նկարիչների տպավորությունները: Ընթերցե՛ք նկարիչների գրառումներն ու հիշողություններն իրենց ուղեւորությունների մասին: Չգիտե՞մ՝ ինչու, սակայն բոլոր նկարիչները զարմանալիորեն լավ են գրում: Հրաշալի գրողներ են Կորոլի-նը, Բենուամ, Դոբուժինսկին, Գրաքարը...

Ինչպե՛ս էին նրանք կարողանում նայել եւ տեսնել, իսկ հետո պատկերել տեսածը ոչ միայն գեղանկարչության մեջ, այլեւ իրենց գրառումներում:

Մ. Վ. Դոբուժինսկին իր հուշերում գրում է, թե իր երիտասարդության տարիներին ինչպիսի մեծ տպավորություն են թողել Մյունխենը, Վենետիկը եւ Փարիզը, երբ առաջին անգամ այցելել է դրանք: Նա ստիպված էր հանկարծակի վերադառնալ Ռուսաստան (արտասահմանում անսպասելիորեն մա-



հացավ Դոբուժինսկիների փոքրիկ որդին, որին նրանք որոշեցին հուղարկավորել հայրենի Վիլյուսում): Եվ ահա Մյունխենից, Փարիզից եւ Վենետիկից հետո նա հայտնվում է լիտվական փոքրիկ գերեզմանների միջեւ: Եվ ահա թե ինչ է գրում նա. «Կնոջս հետ հաճախ էիք կառնել գնում մայրուղով կամ անտառի միջով՝ Նեմանի ուղղությամբ կամ դաշտերի երկայնքով, եւ ես կրկին տեսնում էի տխուր ու սիրելի լիտվական բնապատկերը. ավազաղաշներ, եւ նրանց միջեւ, որպես կանաչ օազիսներ, ռոմանտիկ գերեզմանները՝ ծածկված բարձր խաչերով ու սոճիներով, եւ աշմանային գորշ երկիցը՝ դանդաղ թռչող միայնակ ագռավով:

Այդ գերեզմանները, փորագրված լիտվական խաչերը, հորիզոնի անտառները եւ աղքատիկ Օլիտա գյուղաքաղաքը, որտեղ կանգնած էր փայտե կարմիր հին եկեղեցին, եւ ճանաչում եւ սիրում էի դեռեւս Մյունխեն այցելությունից առաջ, սակայն հիմա՝ այն ամենից հետո, ինչ տեսել եմ արտասահմանում, այդ անկյունն ինձ թվաց չափազանց ինքնատիպ:

Մենք եղանք Վիլյույում, եւ կրկին իմ սիրելի քաղաքն ինձ հմայեց: Եվ ապագայում Վիլյուն՝ իր սքանչելի, մրբազեղ բարոկկոյով (արտասահման իմ յուրաքանչյուր ճանապարհորդությունից հետո, երբ ես Պետերբուրգ այցելելով՝ այնտեղ էի գնում) միշտ համեմատության հաջող քննություն էր բռնում» (Մ. Վ. Դոբուժինսկի, Воспоминания, Москва, 1987, էջ 171):

Ահա սա իսկապես խելացի մարդու իսկական ձեռքբերումն է իր ուղեւորություններից եւ ճամփորդություններից. ներքուստ հարուստ մարդու համար իրեն շրջապատող ողջ աշխարհն անսպառ հարուստ է:

Եվ երկրորդ՝ ուղեւորությունները դաստիարակում են հաստատունություն՝ բարոյական հաստատունություն, սեր առ հայրենին:

Երբ առիթ ունենաք լինելու նոր քաղա-

քում, դիտե՛ք արվեստի հռչակավոր գործերը կամ հանրահայտ բնապատկերները, տեղի մի տվե՛ք այն իրողությանը, որ դրանց մասին լսել եք, ընթերցել, որոնց մասին ձեր «ակամջը տարել են»: Ձեր ընթերցածի մեծագույն մասը կօգնի հասկանալու տեսածի գեղեցկությունն ու արժեքը, սակայն կարող է մասամբ նաեւ խանգարել սեփական՝ ձեր անհատական տպավորություններին: Գնահատե՛ք սեփականը, սակայն գնահատե՛ք անկեղծորեն եւ մի ջանացե՛ք ամեն գնով հակասել ընդհանուր կարծիքին (դա նույնպես հաճախ է հանդիպում խիստ ինքնասեր մարդկանց շրջանում):

Օրինակ բերեմ սեփական տպավորություններից (ցանկանում եք ընդունել այս տպավորությունները, ցանկանում եք՝ ոչ): Ես հին պետերբուրգի-լենինգրադի եմ: Ծնվել եմ Պետերբուրգում, եւ այնտեղ եմ ծնվել նաեւ իմ ծնողները, նախածնողները: ԺՆ դարից ի վեր իմ նախնիներն ապրել են Պետերբուրգում:

Ինձ մանկուց շարունակ ներշնչել են, թե որքան գեղեցիկ է Նեւան. որքան մեծաշուք է Նեւայի կենտրոնը, որքան հանդիսավոր է Նեւայով լադոյան սառույցի երթը, ինչպիսի շքեղություն է հաղորդում քաղաքին Պետրոպավլովյան ամրոցի ասեղը, որքան գեղեցիկ է միջօրեի՝ ուղիղ ժամը 12-ին, ավանդական կրակոցը Պետրոպավլովյան ամրոցի թնդանոթից:

Անվիճելի է, որ Նեւայի կենտրոնն իր ամենալայն մասում գեղեցիկ է: Բայց, չգիտե՛մ՝ ինչու, այդ կենտրոնը տխրություն է բերում վրաս: Այն ամենատխուր եւ ամենաթախծուտ վայրերից է, որ տեսել եմ իմ քաղաքում, հատկապես երբ Ձմեռային ջրանցքից նայում ես Պետրոպավլովյան ամրոցին: Սիրտ է ծնվում թախծից... Հնարավոր է, որ մանկուց լսել եմ ամրոցի բանտարկյալների մասին, ու երեխա ժամանակ վրաս առանձնահատուկ տպավորություն է գործել սարսափելի զրույցն իշխանուհի Տարականովայի մասին, որն իր խցում խեղդվել էր ներս խուժած ջրիեղեղի պատճառով: Չգիտեմ... Եվ աշխարհի զարմանալի ամենագեղեցիկ սառցաերթն այդպիսով իմ մեջ զուգակցվում է ողջ գոյություն ունեցողի խավար անցողիկության հետ:

Իսկ որքան լավն են Պետերբուրգի առավել անձնական վայրերը՝ հատկապես ջրանցքները: Ինչպե՛ր կարող է առավել գեղեցիկ լինել, քան զարմանահրաշ անկյունները, որոնք բացվում են, երբ քայլում ես Մոյկայով (օրինակ՝ Պուշկինի վերջին բնակարանի մոտ), Գրիբոյեդովի ջրանցքով (հատկապես արծվառններով կամրջակի մոտ), Կրյուկովի ջրանցքով (հիշե՛ք զանգակատան մասին, որ կառուցել է Չեւալիենսկին «Նիկոլայ Մորսկոյի» մոտ), Ֆոնտանկայով: Պետերբուրգի ամենագեղեցիկ վայրերից մեկը Նոր Հոլանդիան է, հատկապես՝ Դելամոտի կառուցած նրա մուտքը (ցանկանում եմ ասել «դրոնք»), որը ներս է թողնում ջրանցքը, որով ապրանքները պահեստներ էին բերում: Հատկապես սիրում եմ Գրիբոյեդովի (Եկատերինյան) ջրանցքը, որտեղ փողոցների ճշգրիտ դասավորության մեջ այն ոլորապտույտ է կատարում՝ հիշեցնելով լատինական «Տ» տառը. նայում ես առաջ՝ ջրանցքն է՝ վրայով անցնող հրաշալի կամրջով: Նայում ես հետ՝ կրկին այդ նույն ջրանցքն է: Ջրանցքն աշխուժություն է անկարգություն է բերում փողոցների պետական կարգուկանոնի մեջ, եւ պատահական չէ, որ Դոստոևսկին այդ փողոցները դարձրեց իր «Ոճիր եւ պատիժ» վեպի գործողության վայր: Ռասկոլնիկովի դատողությունները թվացյալ կերպով կարգավորում են կյանքը, իսկ այն իրականում հոսում է իր օրեքներով: Ջուրը հոսում է ջրանցքում, ինչպես հոսում է կյանքը: Ջրանցքը կամ «ջրառում», ինչպես այն անվանում է Դոստոևսկին, «ողողել» է փողոցների պետական ճշգրիտ դասավորվածությունը: Ծայրից ծայր անցե՛ք Գրիբոյեդովի ջրանցքով, Մոյկայով, Կրուշտեյնի ջրանցքով... Իսկ Մոսկվայում անցե՛ք ողջ իմ կրթաթով՝ Միվցե Կրաժեկով:

Քաղաքը խորհրդածությունների տեղիք է տալիս: Խորհրդածությունների տեղիք է տալիս Օրյոլը՝ նրա այն մասը, որտեղ տեղի են ունեցել Տուրգենևի «Ազնվական բույն» վեպի գործողությունները, կամ՝ Օրլիկ գետը, որի մոտ ապրում էր Ն. Ս. Լեսկովի հիանալի «Ամենա Գոլովանը» ստեղծագործության հերոսը: Իսկ վոլգյան քաղաքների ափերի երկայնքով ձգվող հիասքանչ ծառուղիները՝ Սիմբիրսկի, Յարոսլավլի, Կոստրոմայի, Նիժնիի... Սի՞րե չեն ստիպում մեզ մտածել Օստրովսկու, Գորկու, Գոնչարովի հետ միասին:

Ճանապարհորդությունները շատ բան են մեզ համար բացահայտում, շատ բաների մասին են ստիպում մտածել, երազել:

Նամակ երեսուներորդ
ԲԱՐՈՇԱԿԱՆ ԲԱՐՁՈՒՆՔՆԵՐԸ
ԵՎ ԴՐԱՆՑ ՆԿԱՏԱՍԲ
ՎԵՐԱԲԵՐՄՈՒՄԸ

Ահա թե ինչի մասին կցանկանայի ասել. «Նշումներ ռուսականի մասին» եւ «Երկխոսություններ երեկվա, այսօրվա եւ վաղվա օրվա վերաբերյալ» երկերում ես արդեն ուշադրություն եմ հրավիրել ռուսական բնավորության որոշ գծերի վրա, որոնց վերջին ժամանակներում մի տեսակ ընդունված չէ ուշադրություն դարձնել. բարության, բացության, հանդուրժողականության, ազգային սնապարծության բացակայության վրա եւ այլն: Ընթերցողն իրավունք ունի հարցնելու՝ իսկ ո՞ր եմ կորել «Նշումներում» ռուս մարդու բացասական գծերը: Սի՞րե ռուսներին միայն դրական հատկանիշներ են բնորոշ, իսկ մյուս ժողովուրդները դրանցից զրկված են: Ցանկության դեպքում ընթերցողը վերջին հարցի պատասխանը կգտնի հենց «Նշումների» մեջ. ես դրանցում խոսում եմ ոչ միայն ռուս ժողովրդի մասին: Իսկ ինչ վերաբերում է ռուսական թերությունների մասին առաջին հարցին, ապա ամենեւին չեն կարծում, որ ռուս ժողովուրդը զուրկ է դրանցից. ընդհակառակը՝ դրանցից նա շատ ունի, բայց... Կարող եմք արդյոք ժողովրդին բնութագրել իր թերություններով: Չէ՞ որ, երբ գրվում է արվեստի պատմությունը, դրանում ընդգրկվում են միայն բարձրագույն նվաճումները, լավագույն ստեղծագործությունները: Միջակ կամ վատ ստեղծագործություններով չի կարելի գեղանկարչության կամ գրականության պատմություն կառուցել: Եթե ցանկանում ենք պատկերացում կազմել ինչ-որ մի քաղաքի մասին, ապա ամենից առաջ կծանոթանանք նրա լավագույն շենքերին, հրապարակներին, հուշարձաններին, փողոցներին, լավագույն տեսարաններին՝ «քաղաքային բնապատկերներին»: Այլ բան է, երբ ծանոթանում ենք առանձին մարդկանց հետ՝ նրանց բժշկական կամ բարոյական կողմից: Իսկ մենք անդրադառնում ենք ժողովրդի մասին պատկերացումներին: Ժողովուրդը որպես արվեստի ստեղծագործություն. այսպիսին է իմ դիրքորոշումը «Նշումներում»՝ ժողովուրդներից ցանկացածի նկատմամբ իմ մոտեցման մեջ:

Յուրաքանչյուր ժողովրդի մասին պետք է դատել այն բարոյական բարձունքներով եւ այն կատարելատիպերով, որոնցով նա ապրում է: Բարյացկամություն յուրաքանչյուր ազգի՝ ամենասակավաթիվի նկատմամբ: Այս դիրքորոշումն ամենաճիշտն է, ամենաազնիվը: Ընդհանրապես ասած ցանկացած անբարյացկամություն միշտ անհասկացության պատեր է կանգնեցնում:

Բարյացկամությունը, ընդհակառակը, բացում է ճիշտ ճանաչման ուղիները:

Ինքնաթիռը գետնին չի ընկնում ոչ թե այն պատճառով, որ այն թռչելով «հենվում է օդին», այլ այն, որ օդը ներքաշելով՝ ընթանում է վեր՝ երկինք... Ժողովրդի մեջ ամենազիջավորը նրա կատարելատիպերն են:

Շարունակելի

Ռուսերենից թարգմանությունը՝
Տ. Անդրեաս վրդ. ԵՋԵԿՅԱՆԻ

Ս. Ներսես Շնորհալու հանելուկները

Նանելուկներն ի սկզբանե բանահյուսության մաս են կազմել, ապա փոխանցվել գրականությանը: Ըստ Ա. Դյուխանյանի՝ «Հանելուկում իրը, առարկան, երևույթն արտահայտվում է մետաֆորի, փոխաբերության միջոցով, դրա համար էլ հանելուկներն ունեն այլաբանական իմաստ» («Հայ միջնադարյան գրականության հիմնական ուղղություններն ու ժանրերը», Երևան, 2012, էջ 83): Գրավոր առաջին հանելուկները հայ գրականության մեջ մշակել է Դավիթ Քերթոզը Ե դարի առաջին կեսին. նրա մշակած 10 հանելուկները սիրվել ու տարածվել են: Ե դարում Անանիա Շիրակացին ստեղծել է թվաբանական խնդիր-հանելուկների շարք՝ «Հանելուկ դիմակը» խորագրով: Այս հանելուկաշարքը եւս մեծ տարածում է գտել, հիմք հանդիսացել բազմաթիվ տարբերակների առաջացման եւ համանման նոր միավորների ստեղծման: Ե—ԺԱ դարերի ընթացքում ստեղծված հանելուկները եղել են ազատ՝ առանց հանգերի: Կայուն ձևեր չեն եղել նաեւ տողաքանակի առումով. հանդիպել են մեկից մինչեւ մի քանի տող ունեցող հանելուկներ: Ա. Մնացականյանը հայ միջնադարյան հանելուկների դասական շրջանի սկզբնավորող է համարում Ս. Ներսես Շնորհալուն, որը կատարելագործեց հանելուկի ժանրը: Ս. Ներսես Շնորհալին օգտագործել է ժողովրդական հանելուկները լիարժեքորեն՝ թե՛ ձևի, թե՛ բովանդակության առումով. «Ներսես Շնորհալուց առաջ գրված հանելուկները ազատ ու անհանգ ոտանավորներ են՝ անկայուն տներով: Նա առաջին անգամ մշակում է գրավոր հանելուկի բանաստեղծական կայուն ձև՝ ութվանկանի նույնահանգ քառյակը» (Ա. Մնացականյան, Հայ միջնադարյան հանելուկներ (V—XVIII դդ.), Երևան, 1980, էջ 13):

Հանելուկները շատ տարածված ու սիրված են եղել միջնադարում: Ա. Մնացականյանը նշում է, որ հանելուկներ են ասվել հարսանիքներին, խնջույքներին, հավաքներին, ընտանեկան տոնախմբություններին եւ դպրոցներում: Ժողովրդական հանելուկներն առավել մեծ տարածում ունեին, քան հեղինակայինները. առաջիններին կարող էին ծանոթ լինել բոլորը՝ դեռ մանկությունից, ինչի համար հատուկ գրագիտություն չէր պահանջվում, մինչդեռ հեղինակային հանելուկները պահանջում էին գրագիտություն, ձեռագրերից օգտվելու կարողություն, գրական լեզվի իմացություն (տե՛ս անդ): Ս. Ներսես Շնորհալին իր հանելուկներով հաղթահարում է այս անըրպետը:

Նրա հանելուկները նորույթ էին ոչ միայն ժողովրդական բանահյուսության հիմքի վրա ստեղծվելու, մտածողության ձևի, բովանդակության, ոճական առանձնահատկությունների, այլեւ հատկապես լեզվի առումով: Ժողովրդական լայն զանգվածների կրթությունը կարելի էր իրականացնել նրան հասկանալի լեզվով միայն: Գիտակցելով այս կարևոր հանգամանքը՝ Ս. Ներսես Շնորհալին հանելուկների մեծ մասը գրել է ԺԲ դարի ժողովրդական-խոսակցական լեզվով՝ միջին հայերենով:

Ս. Ներսես Շնորհալու մշակած հանելուկներն իրենց հիմքում պահպանել են ժողովրդական հանելուկների բնորոշ հիմնական առանձնահատկությունները: Ժողովրդական հանելուկների նման գրական մշակման ենթարկված հանելուկները եւս ունեն երկմասային կառուցվածք.

1. համեմատության, փոխաբերության, հակադրության, անձնավորման եւ այլ միջոցներով կառուցված գեղարվեստական պատկեր-առաջադրանք,
2. լուծում եւ պատասխան:

Գրական տեսակի աստիճանին բարձրացնելով հանելուկները՝ Ս. Ներսես Շնորհալու նպատակն է եղել զվարճացնելով իրենց ժողովրդական լայն զանգվածներին: Ն. Թահմիզյանը նշում է՝ փաստերը ցույց են տալիս, որ անցյալում ինչպես այլուր, այնպես եւ հայ իրականության մեջ հանելուկները նույնպես ընդգրկվել են ժողովրդական եւ ժողովրդային-մասնագիտացված (գուսանական-աշուղական) երգարվեստի ոլորտում: Հայ ժողովրդական ստեղծագործության մեջ եղել են նաեւ «երգային» հանելուկներ: Ժողովրդական հանելուկներն աղերսվել են ինչպես հեքիաթների, առածների, դյուբանների բանաձև-աղոթքների (որոնք ժամանակին երգվել են), այնպես եւ խաղերի կամ խաղիկների հետ: Ուսումնասիրությունները ցույց են տվել, որ խաղիկներից հանելուկներին անցել են պատրաստի պատկերներ, համեմատություններ ու ընդհանրություններ (տե՛ս Ն. Թահմիզյան, Ներսես Շնորհալին երգահան եւ երաժիշտ, Երևան, 1973, էջ 28—29): Հայկական հանելուկների մեծ մասը չափածո է, իսկ չափերն էլ հիմնականում կարճ են՝ գերակշռւ մասը 4+4 չափով. «Ուշագրավ է, որ նման կառուցվածքի հանելուկներում երբեմն առաջին անդամի սկզբում մի վանկ պակաս է լինում: Այսպիսի դեպքերում եռավանկ մնացած առաջին անդամի առաջին վանկը կրում է «երկար»-ի նշանը (որ գրչագրերից է անցել տպագրին): Եվ դա մշակում է,



թե ոտանավորի հաստատուն կշռույթի մեջ մեկ վանկի պակասը պիտի լրացնել՝ «երկար»-ի նշանը կրող վանկը համապատասխան չափով երկարելով, որ միջնադարում իրագործվել է կամ ոգելու (եղանակավոր ասելու, ասերգելու) եւ կամ էլ երգելու միջոցով» (անդ, էջ 30): Այս ամենից կարելի է ենթադրել, որ Ս. Ներսես Շնորհալին իր հանելուկների մի մասը գոնե հորինել է որպես աշխարհիկ երգեր: Դա է վկայում նաեւ «Առակք վասն մարդկան ուրախութեան» վերտառությունը:

Ա. Դյուխանյանը «Հոգու եւ մարմնի պորբեմը միջնադարի հայ քնարերգության մեջ» գրքում քննում է նաեւ Ս. Ներսես Շնորհալու հանելուկները: Հայոց հայրապետի ստեղծած երգերը հետագայում միջնադարյան մտածողները համարել են «ասացեալ վասն հոգոյ եւ մարմնոյ»: «Այսպես «հոգոյ եւ մարմնոյ» ասելով՝ չպետք է հասկանալ հոգու եւ մարմնի մասին, որովհետեւ ողջ կրոնական բանաստեղծությունն է այդպիսին, այլ պետք է հասկանալ այնպիսի երկեր, ուր մարմինն էլ է իրավունք ստանում... Մինչ այդ գրված բոլոր երգերը անխտիր կարող էին կոչվել «հոգեւոր»: Արդ, ուրեմն, մարմինն էլ է գրվում որպես խորագիր» (Ա. Դյուխանյան, Հոգու եւ մարմնի պորբեմը միջնադարի հայ քնարերգության մեջ, Երևան, 1987, էջ 90): Ս. Ներսես Շնորհալու հանելուկները նորույթ էին նաեւ այս առումով: Ըստ հոգեւոր եւ աշխարհիկ բաժինների՝ «որպես հոգուն ծառայող հանելուկներ տեղ են գտնում զա-

նագան եկեղեցական սրբերի եւ կրոնական հասկացությունների մասին գրված տողեր, իսկ մարմնին ծառայող՝ աշխարհիկ թեմաներով հորինվածները» (անդ, էջ 91):


Այսպես՝ Ս. Ներսես Շնորհալու հանելուկները բաժանվում են երկու խմբի՝ կրոնական եւ աշխարհիկ: Պ. Աղբաշյանը կրոնական բնույթի հանելուկների մասին ասում է, որ «այս թեմայով գրուած հանելուկները համեմատաբար սակաւ են ու կեանքէն կտրուած, նոյնիսկ՝ բռնազբօսիկ ու անհասկնալի» («Շիրակ» (ամսագիր գրականութեան եւ արուեստներու), Բեյրութ, 1973, թ. 11—12, էջ 24): Աշխարհականացման այդ շրջանում, ինչ խոսք, զուցե այս հանելուկների այդքան էլ չէին հետաքրքրում ժողովրդին աշխարհիկ թեմաներով գրված հանելուկների համեմատ, բայց կրոնական միջնադարում հոգեւոր բնույթի հանելուկների ամբողջովին չէին կարող կտրված լինել կյանքից: Մյուս կողմից՝ ինչպես իր այլ ստեղծագործություններով, հանելուկների միջոցով եւս Ս. Ներսես Շնորհալին լուծում էր կրթադաստիարակչական խնդիրներ: Տեսնենք, թե ում կամ ինչի մասին էին կրոնական հանելուկները. Աստված, դրախտ, Ադամ ու Եվա, եղեմական ծառ, Աբել եւ Կայեն, Նոյ, տապան, նավ, Բաբելոնի աշտարակ, Աբրահամ, Դովտ, Մեթիսեդեկ, Իսահակ, Հակոբ, Հովսեփ, փարավոն, Թամար, Մովսես, Ահարոն, Մարիամ, Հեսու, Երիքով, Եփրեմ, Սամսոն, Աննա, Դավիթ, Սամուել, Նաթան, Սողոմոն, Եղիա, Հովաս, Հոբ, Երեմիա, Եզեկիել, Դանիել, Հովնան, Գաբրիել, Մարիամ եւ Հովսեփ, Հերովդես, Հովհաննես, Քրիստոս եւ առաքյալներ, ավետարանիչներ, Պիղատոս, Հուդա, Խաչ, Պողոս, Պետրոս եւ այլն: Եթե ուշադիր նայենք այս հերթականությամբ, կտեսնենք Հին ու Նոր Կտակարանների գլխավոր գործող անձանց: Այսինքն՝ ընդամենը մի քանի տասնյակ հանելուկներում Ս. Ներսես Շնորհալին ընդգրկել է Աստվածաշնչի ամբողջ նյութը: Նա ուներ հստակ նպատակադրում. մատչելի, հակիրճ, ընթերցողին հետաքրքիր ու հաճելի տարբերակով, հասկանալի լեզվով սովորեցնել Սուրբ Գրքի բովանդակությունը, ինչն իր հերթին կօգներ ամուր պահել հավատը, չչեղվել ճիշտ ճանապարհից:

Կրոնական որոշ հանելուկներ վերաբերում են հայ եւ օտարազգի հոգեւորականներին, նրանց թերություններին ու բացասական կողմերին:

Շարունակելի

Գոռ ԳՆԱՍՏԱՆ

Զմրուխտ վազերի սգերգը



Սկիզբը՝ 2022-ի թիվ 14—16

Նետատալինյան տարիների ամբողջ խորհրդային Միությունն արմատական բուռն փոփոխությունների հորձանուտում էր: ԽՍՀՄ նոր ղեկավար Նիկիտա խրուշչովն առաջնահերթ վնասագերծեց Ստալինի մոլեռանդ կամակատար, դաիժ Բերիային: Նրան հաջողվեց հետեւողականորեն ջախջախել ստալինիզմի գաղափարախոսությունը, վեր հանել երկրին ու ժողովրդին պատուհասած անհատի պաշտամունքի ահռելի վնասները, ստալինյան բռնապետության անհամբերի այլանդակությունները:

Խրուշչովյան «ծնհալի» բարերար շունչը Սիբիր էլ հասավ: Կազմաքանդվեց ատելի

ԳՈՒԼԱԳ-ը: Հանրիալի բռնադատված միլիոնավոր մարդիկ զանգվածաբար իրենց հայրենի օջախներ էին վերադառնում, սակայն, ի ցավ սրտի, իրականում նրանցից յուրաքանչյուրն ընդամենը տուն էր տանում իր խաթարված կյանքի... մնացորդն ու առողջության փշրանքները...

Բարենորոգումներն ամենուր էին՝ երկրի կյանքի բոլոր ոլորտներում: ...Բժիշկ Հարությունյանին հիվանդանոցի գլխավոր բժշկի բուժօգնով տեղակալի պաշտոնում տակավին կես տարի էլ չաշխատած՝ զորացրեցին եւ դեպի ազատ կյանք ճանապարհեցին: Մինչ այդ նա, Գեղամին զննելով եւ ներքին հոգեկան բնույթի ախտանշանները նկատելով, նրան տեղափոխել էր նյարդաբանական բաժանմունք: Բժիշկը համոզված էր, որ Գեղամի նյարդային հիվանդությունները՝ մասնավորաբար դյուրագրգռությունը, երբեմնակի ի հայտ եկող հոգեկան անհավասարակշռությունը, ձեռքբերվի են, եւ դրանք սկզբնավորվել են դեռեւս գյուղում՝ Թաթրի Համոյի հետ ունեցած ընդհարման հոգեցունց օրերում, իսկ սիբիրյան կալանավայրերում՝ քրեական հանցագործների միջավայրում, ավելի քան երկու տասնամյակի դաժան ռեժիմն ու տեւական բռնաճնշումները դրանք ավելի են խորացրել, ավերել բնածին, անդորրավետ ներաշխարհը...

Շուտով փակվեց նաեւ հիվանդանոցը...

կալանավոր նոր հիվանդներ չլինելու պարզ պատճառով: Գոնե դույզն-ինչ բուժված չէին Գեղամի ախտահարված ջղերը, երբ նրան պատժաժամկետը կրելու համար կրկին ճամբար վերադարձրին:

Երախտագիտական արտաբուխ արցունքներով նա իրաժեշտ տվեց իր փրկարար եւ անազատության դժմուհի օրերի հոգեկան նեցուկ, մարդասեր ու մեծահոգի հայրենակցին՝ բժիշկ Հարությունյանին: Նրանք այլեւս, էլ երբեք չեն հանդիպի, եւ միայն լուսավոր հուշը կնճա սրտի խորքերում...

Զորացրվելուց հետո բժիշկ Սերյոժա Հարությունյանը մշակակվեց Սոչիի քաղաքամերձ հիվանդանոցներից մեկի գլխավոր բժիշկ, ուր պատվով աշխատեց... ցկյանս...

Գեղամը հաճելիորեն զարմացավ՝ տեսնելով ճամբարի սակավամարդ դարձած բարաքները, ուր մոտալուտ ազատության սպասումով հուսավառվել էին մնացյալ կալանավորների դառնացած սրտերը, եւ նրանք ակներեաբար այլեւս չունեին նախկին կռվազան վարքը, իսկ հսկիչները միմեկին հանդուրժող էին ու բարյացակամ...

Համայնքում շնորհիվ Գեղամի համար վաղաժամ՝ մեկ տարի շուտ եկավ ազատության բաղձալի օրը: «Ազատություն... միթե երազ չէ»,— բերկրում էր նրա սիրտն ու կրծքավանդակում խուտուտ գալիս...

Սիւս եւ տունդարձը... Էլի ապրանքատար, անհարմարավետ վագոններ, կայարաններ-

րում տեւանք ու կանգառներ, սակայն, քաղ լիցի, ուրախ փոթորկվում էր դառնացած հոգին՝ չէ՛ որ տուն է գնում, տուն, տուն...

Շարունակելի

Սերժ ՄԱՆՈՒԿՅԱՆ

ՔՐԻՍՏՈՆՅԱ ՉԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»

թերթի խմբագրություն

Գլխավոր խմբագիր՝

Արփիկե Զանգիկյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/kristonya-hayastan

Ստոր. տպագր. 16.03.2023 թ.

Տպաքանակը՝ 1225